

不愛身慶路



Vertical text on the right edge, likely a library or collection number, partially obscured by the binding.

紀卷第四十一

元史四十一

翰林學士雷夫知制誥兼修國史宋濂翰林待制承直郎兼國史院編修官

勅修

順帝四

三年春正月丙子中書左丞許有壬辭職丁丑享于
 太廟乙酉中書平章政事納麟辭職庚寅沙汰怯薛
 丹名數二月戊戌祭社稷甲辰太陰犯井宿填星犯
 牛宿熒惑犯羅堰丁未立四川省檢校官濠陽吾者
 野人叛乙卯太陰犯氐宿是月汴梁路新鄭密二縣
 地震寶慶路饑判官文殊奴以所受勅牒貸官糧萬



石賑之秦州成紀縣鞏昌府寧遠伏羗縣崩水涌
溺死人無筭三月壬申造鹿頂殿監察御史成遵等
言可用終場下第舉人充學正山長國學生會試不
中者與終場舉人同戊寅詔作新風憲在內之官有
不法者監察御史劾之在外之官有不法者行臺監
察御史劾之歲以八月終出巡次年四月中還司壬
午太陰犯氐宿是月詔脩遼金宋三史以中書右丞
相脫脫爲都總裁官中書平章政事鐵木兒塔識中
書右丞太平御史中丞張起巖翰林學士歐陽玄侍
御史呂思誠翰林侍講學士揭傒斯爲總裁官夏四

月丙申朔日有食之乙巳幸于太廟是月兩都桑果
葉皆生黃色龍文車駕時巡上都五月河決白茅口
六月壬子命經筵官月進講者三是月回回刺里五
百餘人渡河寇掠解吉隰等州中書戶部以國用不
足請撙節浮費秋七月丁卯享于太廟戊辰修大都
城戊寅立永昌等處宣慰司庚辰太白犯右執法是
月興國路大旱河南自四月至是月霖雨不止戶部
復言撙節錢糧八月甲午朔晉寧路臨汾縣獻嘉禾
一莖有八穗者命朶思麻同知宣慰司事鎖兒哈等
討四川上蓬瑣吃賊戊戌祭社稷山東有賊焚掠究

州是月車駕還自上都九月甲子湖廣行省平章政
事鞏卜班擒道州賀州徭賊首唐大二蔣仁五至京
誅之其黨蔣丙自號順天王攻破連桂二州甲申修
理太廟遣官告祭奉遷神主於後殿冬十月乙未增
立巡防捕盜所於永昌丁酉告祭太廟奉安神主戊
戌帝將祀南郊告祭太廟至寧宗室問曰朕寧宗兄
也當拜否太常博士劉聞對曰寧宗雖弟其為帝時
陛下為之臣春秋時魯閔公弟也僖公兄也閔公先
為君宗廟之祭未聞僖公不拜陛下當拜帝乃拜丁
未月食己酉帝親祀上帝于南郊以太祖配癸丑命

僉樞密院事韓元善為中書參知政事中書參議買
術丁同知宣徽院事己未以郊祀禮成詔大赦天下
文官普減一資武官陞散官一等蠲民間田租五分
賜高年帛以湖廣行省平章政事鞏卜班為宣徽院
使行樞密院知院刺刺為翰林學士承旨十一月辛
未享于太廟十二月丙申詔寫金字藏經丁未以別
兒怯不花為中書左丞相是月膠州及屬邑高密地
震河南等處民饑賑糶麥十萬石是歲詔立常平倉
罷民間食鹽徵遺逸脫因伯顏張瑾杜本本辭不至
四年春正月辛未享于太廟辛巳詔定守令黜陟之

法六事備者陞一等四事備者減一資三事備者平
遷六事俱不備者降一等庚寅河決曹州雇夫萬五
千八百修築之是月河又決汴梁二月戊戌祭社稷
辛丑四川行省立惠民藥局是月中書右丞太平陞
平章政事閏月辛酉朔永平澧州等路饑賑之乙亥
月食三月丁酉復立武功縣壬寅特授八禿麻朶兒
只征東行省左丞相嗣高麗國王癸丑以河南行省
平章政事納麟爲中書平章政事集賢大學士姚庸
爲中書左丞夏四月丁亥復立廣樣局是日車駕時
巡上都五月乙未右丞相脫脫辭職不許甲辰許之

以阿魯圖爲中書右丞相乙巳封脫脫爲鄭王食邑
安豐賜金印及海青文豹等物俱辭不受是月大霖
雨黃河溢平地水二丈決白茅堤金堤曹濮濟兗皆
被災六月戊辰鞏昌隴西縣饑每戶貸常平倉粟三
斗俟年豐還官己巳賜脫脫松江田爲立松江等處
稻田提領所秋七月戊子朔溫州颶風大作海水溢
地震益都瀕海鹽徒郭火你赤作亂己丑享于太廟
是月灤河水溢八月戊午祭社稷丁卯山東霖雨民
饑相食賑之丙戌賜脫脫金十錠銀五十錠鈔萬錠
幣帛二百匹辭不受是月陝西行省立惠民藥局莒

州蒙陰縣地震郭火休赤上太行由陵川入壺關至
廣平殺兵馬指揮復還益都車駕還自上都九月丁
亥朔日有食之丙午命太平提調都水監辛亥以南
臺治書侍御史秦從德爲江浙行省參知政事提調
海運癸丑命御史大夫也先帖木兒平章政事鐵木
兒塔識知經筵事右丞達識帖睦爾提調宣文閣知
經筵事冬十月乙酉議修黃河淮河堤堰十一月丁
亥朔以各郡縣民饑不許抑配食鹽復令民入粟補
官以備賑濟戊子禁內外官民宴會不得用珠花已
亥保定路饑以鈔八萬錠糧萬石賑之戊申河南民
饑禁酒十二月己未四川廉訪司建言廣元等五路
廣安等三府永寧等兩宣撫司請依內郡設置推官
一員從之壬戌太陰祀外屏癸亥漢陽地震戊寅徭
賊寇靖州是月東平地震禁淫祠賑東昌濟南般陽
慶元撫州饑民是歲徭賊寇潯州同知府事保童率
民兵擊走之

五年春正月辛卯享于太廟是月薊州地震二月戊
午祭社稷三月辛卯帝親試進士七十有八人賜普
顏不花張士堅進士及第其餘賜出身有差是月以
陳思謙參議中書省事先是思謙建言所在盜起蓋

由歲饑民貧宜大發倉廩賑之以收人心仍分布重
兵鎮撫中夏不聽大都永平鞏昌興國安陸等處并
桃溫萬戶府各翼人民饑賑之夏四月丁卯大都流
民官給路糧遣其還鄉是月汴梁濟南邠州瑞州等
處民饑賑之募富戶出米五十石以上者旌以義士
之號車駕時巡上都五月己丑詔以軍士所掠雲南
子女一千一百人放還鄉里仍給其行糧不願歸者
聽丁未河間轉運司竈戶被水災詔權免餘鹽二萬
引候年豐補還官六月廬州張順興出米五百餘石
賑饑旌其門秋七月丁亥河決濟陰己丑享于太廟

丙午命也先帖木兒鐵木兒塔識並為御史大夫詔
作新風紀八月戊午祭社稷是月車駕還自上都九
月壬午日有食之戊戌開酒禁辛丑以中書右丞達
識帖睦爾為翰林學士承旨中書參知政事搠思監
為右丞資政院使朶兒直班為中書參知政事是月
革罷奧魯冬十月壬子以中書平章政事太平為御
史大夫乙卯享于太廟辛酉命奉使宣撫巡行天下
詔曰朕自踐祚以來至今十有餘年託身億兆之上
端居九重之中耳目所及豈能周知故雖夙夜憂勤
覲安黎庶而和氣未臻災眚時作聲教未洽風俗未

淳吏弊未祛民瘼滋甚豈承宣之寄糾劾之司奉行
有所未至歟若稽先朝成憲遣官分道奉使宣撫布
朕德意詢民疾苦踈滌冤滯蠲除煩苛體察官吏賢
否明加黜陟有罪者四品以上停職申請五品以下
就便處決民間一切興利除害之事悉聽舉行命江
西行省左丞忽都不丁吏部尚書何執禮巡兩浙江
東道前雲南行省右丞散散將作院使王士弘巡江
西福建道大都路達魯花赤拔實江浙行省參知政
事秦從德巡江南湖廣道吏部尚書定僧宣政僉院
魏景道巡河南江北道資政院使蠻子兵部尚書李

獻巡燕南山東道兵部尚書不花樞密院判官靳義
巡河東陝西道宣政院同知伯家奴宣徽僉院王也
速迭兒巡北遼東道荆湖北道宣慰使阿乞刺兩
淮運使杜德遠巡雲南省上都留守阿牙赤陝西行
省左丞王紳巡甘肅永昌道大都留守答爾麻失里
河南行省參知政事王守誠巡四川省前西臺中丞
定定集賢侍講學士蘇天爵巡京畿道平江路達魯
花赤左答納失里都水監賈惟貞巡海北海南廣東
道黃河泛溢辛未遼金宋三史成右丞相阿魯圖進
之帝曰史既成書前人善者朕當取以爲法惡者取

以爲戒然豈止激勸爲君者爲臣者亦當知之卿等其體朕心以前代善惡爲勉己卯監察御史不答失里請罷造作不急之務是月以呂思誠爲中書參知政事十一月甲午至正條格成奉元路陳望叔僞稱燕帖古思太子伏誅十二月丁巳詔定薦舉守令法是歲宣徽院使篤憐鐵穆爾知樞密院事馮思溫爲御史中丞

六年春二月庚戌朔日有食之辛未興國雨雹大者如馬首是月山東地震七日乃止三月辛未盜扼李開務之閘河劫商旅船兩淮運使宋文瓚言世皇開

會通河千有餘里歲運米至京者五百萬石今騎賊不過四十人劫船三百艘而莫能捕恐運道阻塞乞選能臣率壯勇千騎捕之不聽戊申京畿盜起范陽縣請增設縣尉及巡警兵從之山東盜起詔中書參知政事鎖南班至東平鎮過八音龍宜來進馬夏四月壬子遼陽爲捕海東青煩擾吾者野人及水達達皆叛癸丑以長吉爲皇太子宫傅官頒至正條格於天下甲寅以中書參知政事呂思誠爲左丞乙卯享于大廟丁卯車駕時巡上都發米二十萬石賑糶貧民萬戶買住等討吾者野人遇害詔恤其家以中書

左丞呂思誠知經筵事命左右二司六部吏屬於午
後講習經史五月壬午陝西饑禁酒象州盜起江西
田賦提舉司擾民罷之丁亥盜竊太廟神主遣火兒
忽答討吾者野人丁酉以黃河決立河南山東都水
監六月己酉汀州連城縣民羅天麟陳積萬叛陷長
汀縣福建元帥府經歷真實萬戶廉和尚等討之丁
巳詔以雲南賊死可伐盜據一方侵奪路甸命亦禿
渾瓦雲南行省平章政事討之秋七月己卯亨于太
廟丙戌以遼陽吾者野人等未靖命太保伯撒里為
遼陽行省左丞相鎮之丁亥降詔招諭死可伐散毛

洞蠻覃全在叛招降之以為散毛哲厓等處軍民宣
撫使置官屬給宣勅虎符設立驛鋪癸巳詔選怯薛
官為路府縣達魯花赤丙申以朶兒直班為中書右
丞答兒麻為參知政事壬寅以御史大夫亦憐真班
等知經筵事甲辰京畿奉使宣撫定定奏言御史撒
八兒等罪杖黜之時諸道奉使皆與臺憲互相掩蔽
惟定定與湖廣道拔實糾舉無避八月丙午命江浙
行省右丞忽都不花江西行省右丞禿魯統軍合討
羅天麟戊申祭社稷是月車駕還自上都九月乙酉
克復長汀戊子邵武地震有聲如鼓至夜復鳴冬十

月思靖徭寇犯武岡詔湖廣省臣及湖南宣慰元帥
完者帖木兒討之俘斬數百級徭賊敗走閏月乙亥
詔赦天下免差稅三分水旱之地全免靖州徭賊吳
天保陷黔陽癸未汀州賊徒羅德用殺首賊羅天麟
陳積萬以首級送官餘黨悉平十二月丁丑省臣改
擬明宗母壽童皇后徽號曰莊獻嗣聖皇后已卯改
立山東東西道宣慰使司都元帥府開設屯田駐軍
馬甲申詔復立大護國仁王寺昭應宮財用規運總
管府凡貸民間錢二十六萬餘錠辛卯有司以賞賚
汎濫奏請恩賜必先經省臺院定擬甲午設立海海
刺秃屯田二處詔犯贓罪之人常選不用復立八百
宣慰司以土官韓部襲其父爵辛丑以吉刺班爲太
尉開府置僚屬壬寅山東河南盜起遣左右阿速衛
指揮不兒國等討之是歲黃河決尚書李綱請躬祀
郊廟近正人遠邪佞以崇陽抑陰不聽

七年春正月甲辰朔日有食之大寒而風朝官仆者
數人已酉享于太廟壬子命中書左丞相別兒怯不
花爲右丞相尋辭職丁巳復立東路都蒙古軍都元
帥府庚申雲南老丫等蠻來降立老丫耿凍路軍民
總管府丙寅以廣西宣慰使章伯顏討徭獠有功陞

湖廣行省左丞詔以怯薛丹支給浩繁除累朝定額外悉罷之二月甲戌朔興聖宮作佛事賜鈔二千錠已卯山東地震壞城郭棣州有聲如雷河南山東盜蔓延濟寧滕邳徐州等處庚辰以中書參知政事鎖南班爲中書右丞道童爲中書參知政事丙戌以宦者伯帖木兒爲司徒是月徭賊吳天保寇沅州以阿吉刺爲知樞密院事整治軍務三月甲辰中書省臣言世祖之朝省臺院奏事給事中專掌之以授國史纂修近年廢弛恐萬世之後一代成功無從稽考乞復舊制從之乙巳遣使銓選雲南官員修光天殿庚

戌試國子監會食弟子真選補路府及各衛學正戊午詔編六條政類庚申監察御史王士點劾集賢大學士吳直方躡進官階奪其宣命乙丑雲南王孛羅朶獻死可伐之捷壬申遣使修上都大乾元寺命有司定吊賻諸王公主駙馬禮儀之數夏四月乙亥命江浙省臣講究後法己卯享于太廟辛巳遣達本賀方使于占城以通政院使朶郎吉兒爲遼陽行省參知政事討吾者野人已丑發米二十萬石賑糶貧民以翰林學士承旨定住爲中書右丞庚寅復命別兒怯不花爲中書右丞相以中書平章政事鐵木兒塔

識爲左丞相臨清廣平灤河等處盜起遣兵捕之通州盜起監察御史言通州密邇京城而盜賊蜂起宜增兵討之以杜其源不聽是月河東大旱民多饑死遣使賑之車駕時巡上都五月庚戌徭賊吳天保陷武岡路詔遣湖廣行省右丞沙班統軍討之乙丑右丞相別兒怯不花以調燮失宜災異迭見罷詔以太保就第是月臨淄地震七日乃止六月詔免太師馬札兒台官安置西寧州其子脫脫請與父俱行以御史大夫太平爲中書平章政事彰德路大饑民相食秋七月甲寅召隱士完者圖執禮哈琅爲翰林待制

張樞董立爲翰林修撰李孝先爲著作郎張樞不至丙辰太陰犯壘壁陣丁巳以江南行臺大夫納麟爲御史大夫是月徭賊吳天保復寇沅州陷淑浦辰漢縣所在焚掠無遺徙馬札兒台於甘肅以別兒怯不花之譖也九月癸卯八憐內哈刺那海秃魯和伯賊起斷嶺北驛道甲辰遼陽霜早傷禾賑濟驛戶戊申車駕還自上都癸丑上都幹耳朶成用鈔九千餘錠甲寅詔舉材能學業之人以備侍衛丁巳中書左丞相鐵木兒塔識薨辛酉以御史大夫朶兒只爲中書左丞相甲子集慶路盜起鎮南王孛羅不花討平之

丁卯徭寇吳天保復陷武岡延及寶慶殺湖廣行省
右丞沙班于軍中冬十月辛未享于太廟丁丑詔左
右丞相平章樞密知院御史大夫得賜玉押字印餘
官不與庚辰詔建木華黎伯顏祠堂於東平丙戌亦
憐只答兒反遣兵討之辛卯開東華射圃戊戌西蕃
盜起凡二百餘所陷哈刺火州劫供御蒲萄酒殺使
臣是月徭賊吳天保復寇沅州州兵擊走之十一月
辛丑監察御史曲曲以宦者隴普憑藉寵幸驟陞榮
祿大夫追封三代田宅踰制上疏劾之甲辰沿江盜
起剽掠無忌有司莫能禁兩淮運使宋文瓚上言江

陰通秦江海之門戶而鎮江真州次之國初設萬戶
府以鎮其地令戍將非人致使賊艦往來無常集慶
花山劫賊才三十六人官軍萬數不能進討反爲所
敗後竟假手鹽徒雖能成功豈不貽笑宜亟選知勇
以任兵柄以圖後功不然東南五省租賦之地恐非
國家之有不聽撥山東地土十六萬二千餘頃屬大
承天護聖寺乙巳中書戶部言各處水旱田禾不收
湖廣雲南盜賊蜂起兵費不給而各位怯薛冗食甚
多乞賜分揀帝牽於衆請令三年後減之庚戌太陰
犯天廩懷慶路饑徭賊吳天保復陷武岡命湖廣待

省平章政事苟爾領兵討之以河決命工部尚書迷兒馬哈謨行視金堤甲寅徭賊吳天保陷靖州命威順王寬徹不花鎮南王孛羅不花及湖廣江西二省以兵討之丁巳命中書平章政事太平爲左丞相辭不允戊午命河南山東都府發兵討湖廣洞蠻己未以中書省平章政事韓嘉訥爲陝西行臺御史大夫迤北荒旱缺食遣使賑濟驛戶丁卯海北湖南徭賊竊發兩月餘有司不以聞詔罪之并降散官一等是月馬札兒台薨召脫脫還京師十二月庚午以中書左丞相朶兒只爲右丞相平章政事太平爲左丞相

詔天下丙子以連年水旱民多失業選臺閣名臣二十六人出爲郡守縣令仍許民間利害實封呈省壬午晉寧東昌東平恩州高唐等處民饑賑鈔十四萬錠米六萬石丙戌中書省臣建議以河南盜賊出入無常宜分撥達達軍與揚州舊軍於河南水陸關隘戍守東至徐邳北至夾馬營遇賊掩捕從之是月陝西行御史臺臣劾奏別兒怯不花乃逆臣之親子不可居太保之職不從是歲置中書議事平章四人隆福宮三皇后弘吉剌氏木納失里薨八年春正月戊戌朔命也先帖木兒知樞密院事丁

未享于太廟辛亥黃河決遷濟寧路於濟州詔各官
府諳練事務之人毋得遷調詔翰林國史院纂修后
妃功臣列傳學士承旨張起巖學士楊宗瑞侍講學
士黃潛為總裁官左丞相太平左丞呂思誠領其事
甲子木憐等處大雪羊馬凍死賑之是月詔給銅虎
符以宮尉完者不花貴赤衛副指揮使壽山監湖廣
軍命湖廣行省右丞禿赤湖南宣慰都元帥完者帖
木兒討莫磐洞諸蠻斬首數百級其餘二十餘洞縛
其洞首楊鹿五赴京師二月癸酉御史大夫納麟加
太尉致仕乙亥以北邊沙土苦寒罷海海刺禿屯田

丙子命太子愛猷識理達臘習讀畏吾兒文字庚辰
太陰犯軒轅癸未太陰犯平道甲申命星吉為江南
行臺御史大夫壬辰太平言孛答兀禿忙兀三處屯
田世祖朝以行營舊站撥屬虎賁司後為豪有力者
所奪遂失其利今宜仍前撥還從之是月以前奉使
宣撫賈愷貞補職特授永平路總管會歲餘作貞請
降鈔四萬餘錠賑之詔濟寧鄆城立行都水監以賈
魯為都水監三月丁酉詔以東帛旌郡縣守令之廉勤
者遼東鎮火奴反詐稱大金子孫水達達路脫脫禾
孫唐兀火魯火孫討擒之壬寅土番盜起有司請不

元史紀事本末卷之二十一
拘資級委官討之福建盜起地遠難於討捕詔汀漳
二州立分元帥府轄之癸卯帝親試進士七十有八
人賜阿魯輝帖木兒王宗哲進士及第餘出身有差
已酉湖廣行省遣使獻石壁洞蠻捷丙辰太陰犯建
星己未遣使詣江浙江西湖廣四川雲南銓福建番
廣蠻夷等處官負選辛酉遼陽兀顏撥魯歡妄稱大
金子孫受玉帝符文作亂官軍討斬之壬戌六條政
類書成京畿民饑徽州路達魯花赤哈刺不花以政
績聞詔賜金帛旌之是月徭賊吳天保復寇沅州夏
四月辛未河間等路以連年河決水旱相仍戶口消

耗乞減鹽額詔從之乙亥帝幸國子學賜衍聖公銀
印升秩從二品定弟子負出身及奔喪省親等法詔
守令選立社長專一勸課農桑詔京官三品以上歲
舉守令一人守令到任三月亦舉一人自代其玉典
赤拱衛百戶不得授縣達魯花赤止授佐貳久著庶
能則用之平江松江水災給海運糧十萬石賑之丁
丑遼陽董哈刺作亂鎮撫欽察討擒之己卯海寧州
沐陽縣等處盜起遣翰林學士禿堅不花討之是月
享于太廟車駕時巡上都命脫脫爲太傅湖廣章伯
顏引兵捕土寇莫萬五蠻雷等已而廣西峒賊乘隙

入寇伯顏退走五月丁酉朔大霖雨京城崩庚子廣
西山崩水湧灘江溢平地水深二丈餘屋宇人畜漂
沒壬子寶慶大水丁巳四川旱饑禁酒六月丙寅朔
陞徐州為總管府以邳宿滕嶧四州隸之丙戌立司
天臺於上都是月山東大水民饑賑之秋七月丙申
朔日有食之辛丑復立五道河屯田乙巳享于太廟
旌表大都節婦鞏氏門戊申西北邊軍民饑遣使賑
之壬子量移竄徙官於近地安置死者聽歸葬乙卯
遣使祭曲阜孔子廟江州路總管劉恒有政績陞授
山東宣慰使丙辰以阿剌不花為大司徒八月丙子

太陰犯壘壁陣己卯山東雨雹是月車駕還自上都
九月己未太陰犯靈臺冬十月丁亥廣西蠻掠道州
十一月辛亥徭賊吳天保率衆六萬掠全州是歲詔
賜高年帛設分元帥府於沂州以買刻的為元帥備
山東寇台州方國珍為亂聚衆海上命江浙行省參
知政事朶兒只班討之監察御史張楨劾太尉阿乞
刺欺罔之罪又言明里董阿也里牙月魯不花皆陛
下不共戴天之讎伯顏賊殺宗室嘉王郟王一十二
口稽之古法當伏門誅而其子兄弟尚仕于朝宜急
誅竄別兒怯不花阿附權姦亦宜遠貶今災異迭見

元史紀事本末卷四十一
盜賊蜂起海寇敢於要君閩帥敢於玩寇若不振舉
恐有唐末藩鎮噬臍之禍不聽監察御史李泌言世
祖誓不與高麗共事陛下踐世祖之位何忍忘世祖
之言乃以高麗奇氏亦位皇后今災異屢起河決地
震盜賊滋蔓皆陰盛陽微之象乞仍降為妃庶幾三
辰奠位災異可息不聽

紀卷第四十一

紀卷第四十二

元史四十二

翰林學士大夫知制誥兼修國史臣宋濂翰林待制承直郎知制誥兼國史院編修官王禕等奉

勅修

順帝五

九年春正月丁酉享于太廟癸卯立山東河南等處
行都水監專治河患乙巳廣西徭賊復陷道州萬戶
鄭均擊走之丙午命中書平章政事太不花提調會
同館庚戌太白犯建星辛亥太白犯平道二月戊辰
祭社稷辛巳太不花辭職不允甲申太陰犯建星三
月丁酉坝河淺澁以軍士民夫各一萬濬之己亥太

白犯壘壁陣己巳命大司農達識帖睦爾為湖廣行
省平章政事是月河北瀆陳州麒麟生不乳而死賊
吳天保復寇沅州夏四月丁卯享于太廟丁丑以知
樞密院事欽察台為中書平章政事己卯以燕南廉
訪使韓元善為中書左丞立鎮撫司於直沽海津鎮
壬午以河間鹽運司水災住煎鹽三萬引是月車駕
時巡上都五月戊戌命太傅脫脫提調大幹耳朶內
史府庚子詔修黃河金堤民夫日給鈔三貫辛丑罷
瑞州路上高縣長官司庚戌命翰林國史院等官薦
舉守令丙辰定守令督攝之法路督攝府府督攝州
州督攝縣是月白茅河東江沛縣遂成巨浸蜀江大
溢浸漢陽城民大饑六月丙子刻小玉印以至正珎
秘為文凡秘書監所掌書畫皆識之秋七月庚寅監
察御史幹勒海壽劾奏殿中侍御史哈麻及其弟雪
雪罪惡御史大夫韓嘉訥以聞不省章三上詔奪哈
麻雪雪官出海壽為陝西廉訪副使韓家訥為宣政
院使壬辰詔命太子愛猷識理達臘習學漢人文書
以李好文為諭德歸暘為贊善張冲為文學李好文
等上書辭不許賜公主不答昔你平江田五十頃甲
午以也先帖木兒為御史大夫乙未以湖廣行省左

丞相亦憐真班知樞密院事丙午太陰犯壘壁陣癸丑太陰犯天關甲寅以栢顏為集賢太學士乙卯罷右丞相朶兒只依前為國王左丞相太平為翰林學士承旨是月大霖雨水沒高唐州城江漢溢漂沒民居禾稼閏月辛酉詔脫脫為中書右丞相仍太傅韓家訥為江浙行省平章政事庚午以也可扎魯忽赤搠思監為中書右丞同知樞密院事王樞虎兒吐華為中書參知政事辛巳詔赦湖廣徭賊誑誤者戊子命岐王阿剌乞鎮西番八月甲辰以集賢大學士栢顏為中書平章政事河南行省平章政事月魯不花

為宣政院使庚戌以司徒雅普化提調太史院知經筵事是月車駕還自上都九月甲子凡建言中外利害者詔委官選其可行之事以聞丙寅命平章政事栢顏提調留守司丙子中書平章政事定住以疾辭職不允辛巳命知樞密院事亦憐真班提調武備寺丙戌熒惑犯靈臺是月遣御史中丞李獻代祀河瀆冬十月辛卯享于太廟丁酉命皇太子愛猷識理達臘自是日為始入端本堂肄業命脫脫領端本堂事司徒雅普化知端本堂事端本堂虛中座以俟至尊臨幸太子與師傅分東西向坐授書其下僚屬以次

列坐十一月戊午朔日有食之戊辰太陰犯畢宿庚辰太白犯壘壁陣十二月戊戌太白復犯壘壁陣丁未徭賊吳天保陷辰州是歲詔汰冗官均俸祿賜致仕官及高年帛漕運使賈魯建言便益二十餘事從其八事其一曰京畿和糴二曰優卹漕司舊領漕戶三曰接運委官四曰通州總治豫定委官五曰船戶困於坝夫海糧壞於坝戶六曰疏濬運河七曰臨清運糧萬戶府當隸漕司八曰宜以宣忠船戶付本司節制冀寧平遙等縣曹七七反命刑部郎中八十兵馬指揮沙不丁討平之

十年春正月丙辰朔以中書右丞搠思監為平章政事王樞虎兒吐華為中書右丞壬戌立四川容羨洞軍民總管府壬申太陰犯熒惑甲戌隕石棹州色黑中微有金星先有聲自西北來至州北二十里乃隕二月丙戌詔加封天妃父種德積慶侯母育聖顯慶夫人辛丑太陰犯平道甲辰太陰犯鍵閉三月己卯熒惑犯太微垣是月奉化州山石裂有禽鳥草木山川人物之形夏四月己丑左司都事武祺建言更鈔法丁酉赦天下其略曰朕纂承洪業撫臨萬邦夙夜厲精靡遑暇逸比緣倚注失當治理乖方是用圖任一

相俾贊萬機受命脫脫爲中書右丞相統正百官允
釐庶績曾未朞月百度具舉中外協望朕甚嘉焉尚
慮軍國之重民物之繁政令有未孚生息有未遂可
赦天下丙午太白犯鬼宿是月車駕時巡上都六月
壬子星大如月入北斗震聲若雷三日復還秋七月
辛酉太陰犯房宿癸亥以大護國仁王寺昭應宮財
用規運總管府仍屬宣政院辛未太白晝見丁丑太
白復晝見八月壬寅車駕還自上都九月癸丑朔太
白晝見辛酉祭三皇如祭孔子禮先是歲祀以醫官
行事江西廉訪使文殊訥建言禮有未備乃勅工部

具祭器江浙行省造雅樂太常定儀式翰林撰樂章
至是用之壬戌熒惑犯天江庚午命樞密院以軍士
五百修築白河堤壬午脫脫以吏部選格條目繁多
莫適據依銓選者得以高下之請編類爲成書從之
冬十月癸巳歲星犯軒轅乙未吏部尚書僕哲篤建
言更鈔法命中書省御史臺集賢翰林兩院之臣集
議之丙申太陰犯昴宿辛丑置諸路寶泉都提舉司
於京城是月大名東平濟南徐州各立兵馬指揮司
以捕上馬賊十一月壬子朔口有食之丙辰以高麗
潘王之孫脫脫不花等爲東宮怯薛官辛酉罷遼陽

濱海民煎熬野鹽戊辰太陰犯鬼宿己巳詔天下以
中統交鈔壹貫文權銅錢壹千文準至元寶鈔壹貫
仍鑄至正通寶錢並用以實鈔法至元寶鈔通行如
故是月三星隕于耀州化爲石如斧形削之有屑擊
之有聲十二月壬午朔修大都城辛卯以大司農禿
魯等無領都水監集河防正官議黃河便益事命前
同知樞密院事不顏不花等討廣西徭賊乙未太陰
犯鬼宿己酉方國珎攻温州是歲京師麗正門樓上
忽有人妄言災禍鞫問之自稱薊州人已而不知所
往

十一年春正月乙卯享于太廟丙辰辰星犯牛宿庚
申命江浙行省左丞孛羅帖木兒討方國珎丁卯蘭
陽縣有紅星太如斗自東南墜西北其聲如雷己卯
命搠思監提調大都留守司二月庚寅太陰犯鬼宿
乙未太陰犯太微丁酉太陰犯亢宿是月命遊皇城
中書省臣諫止之不聽立湖南元帥府于寶慶
路三月庚戌立山東分元帥府于登州丙辰親策進
士八十三人賜朶烈圖文允中進士及第其餘賜出
身有差壬戌徵建寧處士彭炳爲端本堂說書不至
丁卯太陰犯東咸戊辰太陰犯天江是月遣使賑湖

南北被寇人民死者鈔五錠傷者三錠燬所居屋者一錠夏四月壬午詔開黃河故道命賈魯以工部尚書爲總治阿防使發汴梁大名十三路民十五萬廬州等戍十八翼軍二萬自黃陵岡南達白茅放于黃固哈只等口又自黃陵西至陽青村合于故道凡二百八十里有奇仍命中書右丞玉樞虎兒吐華同知樞密院事黑廝以兵鎮之巢寧路屬縣多地震半月乃止乙酉享于太廟詔加封河瀆神爲靈源神祐弘濟王仍重建河瀆及西海神廟改永順安撫司爲官撫司丁酉孟州地震庚子罷海西遼東道巡防捕盜

所立鎮寧州辛丑師壁安撫司土官鹽什用盤順府土官墨奴什用降立長官司四巡檢司七乙巳彰德路雨雹形如斧傷人畜是月罷沂州分元帥府改立兵馬指揮使司復分司于膠州車駕時巡上都五月己酉朔日有食之辛亥潁州妖人劉福通爲亂以紅巾爲號陷潁州初欒城人韓山童祖父以白蓮會燒香惑衆謫徙廣平永平縣至山童倡言天下大亂彌勒佛下生河南及江淮愚民皆翕然信之福通與杜遵道羅文素盛文郁王顯忠韓咬兒復鼓妖言謂山童實宋徽宗八世孫當爲中國主福通等殺白馬

黑牛誓告天地欲同起兵爲亂事覺縣官捕之急福通遂反山童就擒其妻楊氏其子韓林兒逃之武安癸丑文水縣雨雹壬申命同知樞密院事禿赤以兵討劉福通授以分樞密院印丙子命大都至汴梁二十四驛凡馬一疋助給鈔五錠六月發軍一千從直沽至通州疏濬河道是月劉福通據朱臯攻破羅山真陽確山遂犯舞陽葉縣等處江浙左丞孛羅帖木兒爲方國珍所敗秋七月丙辰廣西大水丁巳罷四川大奴管勾洞長官司改立忠孝軍民府己未太陰犯斗宿壬戌太陰犯右執法己巳太白犯左執法

惑入鬼宿是月開河功成乃議塞決河命大司農達識帖睦爾及江浙行省叅知政事樊執敬浙東廉訪使董守憲同招諭方國珍八月丁丑朔中興地震戊寅祭社稷乙酉太陰犯天江丙戌蕭縣李二及老彭趙君用攻陷徐州李二號芝麻李與其黨亦以燒香聚衆而反是月車駕還自上都斬州羅田縣人徐真一名壽輝與黃州麻城人鄒普勝等以妖術陰謀聚衆遂舉兵爲亂以紅巾爲號九月戊申以中書平章政事朶兒直班提調宣文閣知經筵事平章政事定住提調會同館事壬子命

御史大夫也先帖木兒知樞密院事及衛王寬徹哥
總率大軍出征河南妖寇各賜鈔一千錠從征者賜
予有差乙卯辰星犯左執法丁巳太白犯房宿壬戌
詔以高麗國王不荅失里之弟伯顏帖木兒襲其王
封不荅失里之子遂廢戊辰太陰犯鬼宿是月劉福
通陷汝寧府及息州光州衆至十萬徐壽輝陷蘄水
縣及黃州路冬十月戊寅熒惑犯太微垣己卯享于
太廟辛巳太陰犯斗宿癸未立寶泉提舉司于河南
行省及濟南真寧等路凡九江浙江西湖廣行省等
處凡三命知樞密院事老章以兵同也先帖木兒討

河南妖寇乙酉太白犯斗宿己丑太白晝見熒惑犯
歲星辛卯太白犯斗宿立中書分省于濟寧癸巳歲
星犯右執法癸卯以宗王神保克復睢寧虹縣有功
賜金帶一從征者賞銀有差丙午熒惑犯左執法是
月天雨黑子于饒州大如黍菽徐壽輝據蘄水爲都
國號天完僭稱皇帝改元治平以鄒普勝爲太師十
一月癸丑有星孛于婁宿甲寅孛星見于胃宿乙卯
丙辰亦如之丁巳太陰犯填星孛星微見于畢宿黃
河堤成散軍民役夫庚午監察御史徹徹帖木兒等
言右丞相脫脫治河功成宜有異數以旌其勞甲戌

元史紀卷四十三
江西妖人鄧南二作亂攻瑞州總管禹蘇福擒斬之
是月遣使以治河功成告祭河伯召賈魯還朝超授
榮祿大夫集賢大學士賜金繫腰一銀十錠鈔千錠
幣帛各二十匹都水監并有司官有功者三十七員
皆陞遷其職詔賜脫脫峇刺罕之號俾世襲之以淮
安路為其食邑命立河平碑十二月丙子朔太白晝
見丁丑太白經天巳卯立河防提舉司隸行都水監庚
辰太白經天是夜犯壘壁陣甲申太陰犯填星丙戌太白
復經天是夜復犯壘壁陣以治書侍御史烏古孫良楨
為中書叅知政事辛卯太白經天壬辰復如之丁酉太

白晝見太陰犯熒惑命脫脫於淮安立諸路打捕鷹
房民匠錢糧總管府秩從三品庚子太白經天辰星
犯天江辛丑太白經天也先帖木兒復上蔡縣擒韓
咬兒等至京師誅之壬寅太白晝見是歲括馬

十二年春正月丙午朔詔印造中統元寶交鈔一百
九十萬錠至元鈔十萬錠戊申竹山縣賊陷襄陽路
總管柴肅死之是日荆門州亦陷巳酉時享太廟庚
戌以宣政院使月魯不花為中書平章政事壬子中
書省臣言河南陝西腹裏諸路供給繁重調兵討賊
正當春首畊作之時恐農民不能安於田畝守令有

失勸課宜委通曉農事官負分道巡視督勒守令親詣鄉都有諭農民依時播種務要人盡其力地盡其利其有曾經盜賊水患供給之處貧民不能自備牛種者所在有司給之仍令總兵官禁止屯駐軍馬毋得踏踐以致農事廢弛從之乙卯淮東宣慰司添設同知宣慰司事及都事各一員丙辰徐壽輝遣僞將丁普郎徐明遠陷漢陽丁巳陷興國府己未徐壽輝遣鄒普勝陷武昌威順王寬徹普化湖廣行省平章政事和尚棄城走刑部尚書阿魯收捕山東賊給勅牒十一道使分賞有功者辛酉徐壽輝僞將曾法興

陷安陸府知府丑驢戰不勝死之癸亥刑部添設尚書侍郎郎中員外郎各一員五愛馬添設忽刺罕赤二百名乙丑太陰犯熒惑丙寅以河復故道大赦天下己巳歲星犯右執法辛未徐壽輝兵陷沔陽府壬申中興路陷山南宣慰司同知月古輪失領兵出戰衆潰宣慰使錦州不花山南廉訪使卜禮月敦皆遁走是月命達魯曾爲淮東添設元帥統領兩淮所募鹽丁五千討徐州拘刷河南陝西遼陽三省及上都大都腹裏等處漢人馬命四川行省平章政事月魯帖木兒爲總兵官與四川行省右丞長吉討興元金

州等處賊宣政院同知桑哥率領亦都護畏吾兒軍
與荆湖北道宣慰使朶兒只班同守襄陽濟寧兵馬
指揮使寶童統領右都衛軍從知樞密院事月闍察
兒討徐州二月乙亥朔詔許溪洞蠻搖自新丁丑以
集賢大學士賈魯為中書添設左丞以河南廉訪使
哈藍朶兒只為荆湖北道宣慰使都元帥守襄陽癸
未命諸王禿堅領從官百人馳驛守揚州賜金一錠鈔一
千錠命寧王牙安沙鎮四川賜鎮南王孛羅不花鈔
一萬錠甲申鄒平縣馬子昭為亂捕斬之乙酉徐壽
輝兵陷江州總管李黼死之遂陷南康路丙戌霍州

靈石縣地震徐壽輝兵陷岳州房州賊陷歸州戊子
詔徐州內外群聚之衆限二十日不分首從一與赦
原置安東安豐分元帥府己丑游皇城庚寅太陰犯
太微垣癸巳太陰犯氏宿辛丑鄧州賊王權張椿陷
澧州龍鎮衛指揮使俺都刺哈蠻等帥師復之褒贈
伏節死義宣徽使帖木兒等二十七人壬寅以御史
大夫納麟為江南行臺御史大夫仍太尉命翰林學
士承旨八剌與諸王孛蘭奚領軍守大名癸卯命中
書平章政事月魯不花知經筵事左丞賈魯參知政
事帖理帖木兒烏古孫良楨並同知經筵事是月賊

侵滑濬命德住爲河南右丞守東明德住時致仕于
家聞命馳至東明浚城隍嚴備禦賊不敢犯徐壽輝
僞將歐祥陷袁州命帖理帖木兒以中書參知政事
分省濟寧三月乙巳朔追封太師忠王馬扎兒台爲德王
丁未徐壽輝僞將許甲攻衡州洞官黃安撫敗之徐
壽輝僞將陶九陷瑞州總管禹蘇福萬戶張岳敗之
壬子河南左丞相太不花克復南陽等處癸丑中書
省臣請行納粟補官之令凡各處士庶果能爲國宣
力自備糧米供給軍儲者照依定擬地方實授常選
流官依例陞轉封廕及已除茶鹽錢穀官者能再備
錢糧供給軍儲者驗見授品級改授常流從之戊午
太陰犯進賢辛酉命親王阿兒麻以兵討商州等處
賊以鞏卜班知行樞密院事壬戌太陰犯東咸甲子
徐壽輝僞將項普略陷饒州路遂陷徽州信州四川
未附生蠻向亞甲洞主墨得什用出降立盤順府丁
卯江南行臺御史大夫帖木哥乞致仕不允以爲甘
肅行省平章政事以出征馬少出幣帛各一十萬匹
於迤北萬戶千戶所易馬戊辰太白晝見詔南人有
才學者依世祖舊制中書省樞密院御史臺皆用之
中書省臣言張理獻言饒州德興三處膽水浸鐵可

以成銅宜即其地各立銅冶場直隸寶泉提舉司宜以張理就為銅冶場官從之以江浙行省左丞相亦憐真班為江西行省左丞相領兵收捕饒信賊庚午詔隨朝一品職事及省臺院六部翰林集賢司農太常宣政宣徽中政資正國子秘書崇文都水諸正官各舉循良材幹智勇兼全堪充守令者二人知人多者不限負數各處試用守令並授兼管義兵防禦諸軍奧魯勸農事所在上司不許擅差守令既已優陞其左貳官負比依入廣例量陞二等任滿驗守令全治者與真優不治者全削二等依本等叙半治者減

一等叙雜職人負其有知勇之士並依上例凡除常選官於殘破郡縣及逼近賊境之處陞四等稍近賊境陞二等是月方國珍復劫其黨下海入黃巖港台州路達魯花赤秦不花率官軍與戰死之隴西地震百餘日城郭頽夷陵谷遷變定西會州靜寧庄浪尤甚會州公宇中墻崩獲弩五百餘張長者文餘短者九尺人莫能挽改定西為安定州會州為會寧州詔定軍民官不守城池之罪閏三月辛巳以台州路達魯花赤秦不花為江浙行省參知政事行台州路事命下秦不花已死壬午以大理宣慰使谷失八都魯為

四川行省添設參知政事與本省平章政事咬住討
山南湖廣等處賊乙酉徐壽輝僞將陳普文陷安吉
路鄉民羅明遠起義兵復之命工部尚書朶朶兵部
侍郎馬某火者分詣上都察罕腦兒集寧等處給散
出征河南達達軍口糧立淮南江北等處行中書省
治揚州轄揚州高郵淮安滁州和州廬州安豐安慶
蘄州黃州壬辰以大都留守兀忽失為江浙行省添
設右丞討饒信賊丙申阿速愛馬里納忽台擒滑州
開州賊韓兀奴罕有功授資用庫太使丁酉湖廣行
省參知政事鐵傑以湖南兵復岳州戊戌詔淮南行

省設官二十五員以翰林學士承旨晃火兒不花湖
廣平章政事失列門並為平章政事淮東元帥蠻子
為右丞燕南廉訪使秦從德為左丞陝西行臺侍御
史答失禿山北廉訪使趙璉並為參知政事庚子以
樞密副使悟良哈台為中書添設參知政事同知經
筵事辛丑命淮南行省平章政事晃火兒不花提調
鎮南王傅事是月詔四川行省平章政事咬住以兵
東討荆襄賊克復忠萬夔雲陽等州命江西行省左
丞相亦憐真班以兵守江東西關隘命諸王亦憐真
班愛因班參知政事也先帖木兒與陝西行省平章

政事月魯帖木兒討南陽襄陽賊刑部尚書阿魯討
海寧賊江西行省右丞火你赤與參知政事桑解討
江西賊以浙東宣慰使恩寧普代江浙行省左丞左
蒼納失里守蕪湖命江西行省右丞兀忽失江浙行
省左丞老老與星吉不顏帖木兒蠻子海牙同討饒
信等處賊方國珍不受招安之命命江浙左丞左蒼
納失里討之命典瑞院給淮南行省銀字圓牌三面
驛券五十道詔江西行省左丞相亦憐真班淮南行
省平章政事晃火兒不花江浙行省左丞左蒼納失
里所廣行省平章政事也先帖木兒四川行省平章
政事八失忽都及江南行臺御史大夫納麟與江浙
行省官並以便宜行事也先帖木兒駐軍沙河軍中
夜驚軍潰退屯朱仙鎮詔以中書平章政事蠻子代
總其兵也先帖木兒還京師仍命為御史大夫夏四
月癸卯朔日有食之江西臨川賊鄧忠陷建昌路已
酉時享太廟甲寅以御史大夫搠思監為中書平章
政事提調留守司乙卯鐵傑及萬戶陶夢楨復武昌
漢陽尋再陷丙辰江西宜黃賊塗佑與邵武建寧賊
應必達等攻陷邵武路總管吳按攤不花以兵討之
千戶魏淳以計擒塗佑應必達復其城辛酉翰林學

士承旨渾都海牙乞致仕不允以為中書平章政事
 四川行省參知政事桑哥失里復渠州甲子翰林學
 士承旨歐陽玄以湖廣行省右丞致仕賜玉帶及鈔
 一百錠給全俸終其身戊辰諸王秃堅帖木兒平章
 政事也先帖木兒討和州有功各賜金繫腰并鈔一
 千錠辛未荆門知州聶炳復荆門州平章政事忽都
 海牙年老有疾詔免其朝賀是月大駕時巡上都永
 懷縣賊陷桂陽咬住復歸州進攻峽州與峽州總管
 趙余禡大破賊兵誅賊將李太素等遂平之詔天下
 完城郭築隄防命亦都護月魯帖木兒領畏吾兒軍

馬同豫王阿剌忒必失里知樞密院事老章討襄陽
 平陽鄧州賊陝西行臺監察御史蒙吉魯海牙范文
 英對言也先帖木兒喪師辱國乞明正其罪詔不允
 賊劍望臺御史大夫朶爾直班為湖廣行省平章政
 事英對言海牙十二人為各路添設佐貳官五月癸
 酉朔太白犯鎮星戊寅命龍虎山張嗣德為三十九
 代天師給印章海道萬戶李世安建言權停夏運從
 命江南行臺御史大夫納麟給宣勅與台州民陳
 由揚怒卿趙士正戴甲令其集民丁夾攻方國瑛
 已卯改住復中興略庚辰監察御史徹徹帖木兒等

言河南諸處群盜輒引亡宋故號以爲口實宜以瀛
國公子和尚趙完普及親屬徙沙州安置禁勿與人
交通從之罷朮兒棚等處金銀場課癸未建昌民戴良
起鄉兵克復建昌路乙酉命留守帖木哥與諸王朶
兒只守口北龍慶州是月朮失八都魯至荆門增募
兵趨襄陽與賊戰大敗克之命左朮納失里仍守蕪
湖險隘六月丙午中書省臣言大名路開滑濬三州
元城十一縣水旱蟲蝗饑民七十一萬六千九百八
十口給鈔十萬錠賑之戊申命治書侍御史杜秉燾
中書參議李稷並兼經筵官辛亥太白犯井宿河南

行省左丞西納祿參知政事王也速迭兒並以失誤

軍需左遷添設淮西宣慰使隨軍供給命河南行省
平章政事禿魯參知政事李猷供給汝寧軍需丁巳
賜中書參知政事悟良哈台珠衣并帽乙丑宣讓王
帖木兒不花諸王乞塔歹曲憐帖木兒及淮南廉訪
使班祝兒並平賊有功賜金繫腰銀鈔有差紹慶宣
慰使楊延禮不花遙授湖廣左丞楊伯顏卜花爲紹
慶宣慰使換文資楊城爲沿邊溪洞招討使兼征行
萬戶回賜先所拘收牌面丙寅紅巾周伯顏陷道州
修太廟西神門秋七月丁丑時享太廟庚辰饒徽賊

元史紀事本末卷之四十二
六

昱嶺關陷杭州路辛巳命通政院使谷兒麻失里
樞密副使禿堅不花討徐州賊給勅牒三十道以
功已丑湘鄉賊陷寶慶路庚寅以殺獲西番首賊
功賜岐王阿剌乞巴鈔一千錠邠王嵬厘諸王班的
失監平章政事鎖南班各金繫腰一以征西元帥幹
羅為章佩添設少監討徐州脫脫請親出師討徐州
詔許之辛卯命脫脫台為行樞密院使提調二十萬
戶賜金繫腰一銀鈔幣帛有差丁酉辰星犯靈臺以
杜秉彝為中書添設參知政事湖南元帥副使小云
失海牙總管兀顏思忠復寶慶路是月徐壽輝偽稱

王善康壽四江二蠻等陷福安寧德等縣八月癸卯
命中書參知政事帖理帖木爾淮南行省右丞蠻子
供給脫脫行軍一應所需方國珍率其眾攻台州城
浙東元帥也忒迷失福建元帥黑的兒擊退之甲辰
以同知樞密院事哈麻為中書添設右丞齊王失列
門獻馬一萬五千疋于京師賜脫脫金三錠銀三十
錠鈔一萬錠幣帛各一千疋丁未日本國白高麗賊
過海剽掠身稱島居民高麗國王伯顏帖木兒調兵
勦捕之賜金繫腰一鈔二千錠己酉命知樞密院事
咬咬中書平章政事搠思監也可扎魯忽赤福壽並

從脫脫出師征徐州賜金繫腰及銀鈔幣帛有差翰
林學士承旨闊怯鎮遏五投下百姓賜金繫腰一壬
子以扎撒溫孫爲河南行省右丞僕哲篤爲淮南行
省左丞各賜鈔五十錠丙辰以禿思迷失爲淮南行
省平章政事丁巳命中書平章政事普化知經筵事
脫脫將出師六部尚書密邇麻和謨等上言大臣天
子之股肱中書庶政之根本不可以一日離乞詔留
賢相弼亮天工如此則內外有兼治之宜社稷有倚
重之寄不報脫脫言皇后幹耳朶思支用不敷自今
爲始每年宜給金一十錠銀五十錠以同知樞密院

事雪雪出軍南陽同知樞密院事禿赤出軍河南皆
有功各進階榮祿大夫中書右丞哈麻進階榮祿大
夫庚申命哈麻等提調各怯薛各愛馬口糧丁卯太
白犯歲星詔脫脫以荅剌罕太傅中書右丞相分省
于外督制諸處軍馬討徐州中書省樞密院御史臺
分官屬從行稟受節制爵賞有功誅殺有罪綏順討
逆悉聽便宜從事是日發京師是月大駕還大都安
陸賊將俞君正復陷荊門州知州聶炳死之賊將党
仲達復陷岳州九月乙亥俞君正復陷中興咬住領兵與
戰於樓臺敗績奔松滋本路判官上都死之己卯監

察御史及河南分御史臺行樞密院河南廉訪司鞏
昌總帥府陝西都府義兵萬戶府等官交章言御史
大夫也先帖木兒出征河南功績庚辰賜也先帖木
兒金繫腰一金一錠銀一十錠鈔五千錠幣帛各一
百匹癸未中興義士范忠偕荆門僧李智率義兵復
中興路俞君正敗走龍鎮衛指揮使俺都刺哈蠻領
兵入城咬住自松滋還屯兵于石馬乙酉脫脫至徐
州丁亥命知行樞密院事阿刺吉從脫脫討徐州賜
金繫腰一金一錠銀五錠鈔幣有差辛卯脫脫復徐
州屠其城芝麻李等遁走壬辰太陰犯軒轅戊戌賜
哈麻鈔三百錠買玉帶己亥賊攻辰州達魯花赤和
尚擊走之庚子詔加脫脫為太師班師還京冬十月
丁未時享太廟庚戌知樞密院事老章進階金紫光
祿大夫命平章定住右丞哈麻同知經筵事癸丑命
和羅粟豆五十萬石于遼陽甲寅拜知行樞密院事
阿乞刺為太尉淮南行省平章政事戊午太陰犯鬼
宿甲子太陰犯歲星乙丑太陰犯亢宿十一月辛未
命江浙行省平章政事慶童收捕常州賊乙亥以星
吉為江西行省平章政事出師湖廣丙子中書省臣
請為脫脫立徐州平寇碑及加封王爵癸未命江浙

行省右丞帖理帖木兒總兵討方國珍已丑以脫脫
平徐功賜金一十錠銀一百錠鈔五萬錠幣帛各三
千匹上表辭從之庚寅太陰犯太微垣十二月壬寅
谷失八都魯復襄陽辛亥詔以杭常湖信廣德諸路
皆克復赦誅誤者蠲其夏稅秋糧命有司撫恤其民
辛酉以湖廣行省叅知政事卜顏不花右丞阿兒灰
討徭賊復湖南潭岳等處有功卜顏不花陞散階從
一品阿兒灰陞正二品癸未脫脫言京畿近地水利
召募江南人耕種歲可得粟麥百萬餘石不煩海運
而京師足食帝曰此事有利於國家其議行之是歲
海運不通立都水庸田使司于汴梁掌種植之事賴
州沈丘人察罕帖木兒與信陽州羅山人李思齊同
起義兵破賊有功授察罕帖木兒中順大夫汝寧府
達魯花赤李思齊知汝寧府

紀卷第四十二

紀卷第四十三

元史四十三

翰林學士雷美知制誥兼修國史兼翰林待制查晉知制誥兼國史院編修官王禕等奉

勅

順帝六

十三年春正月庚午朔用帝師請釋放在京罪囚以
中書添設平章政事哈麻為平章政事參知政事悟
良哈台為右丞參知政事烏古孫良楨為左丞詔印
造中統元寶交鈔一百九十萬錠至元鈔一十萬錠
辛未命悟良哈台烏古孫良楨兼大司農卿給分司
農司印西自西山南至保定河間北至檀順州東至

遷民鎮凡係官地及元管各處屯田悉從分司農司立法佃種合用工價牛具農器穀種召募農夫諸費給鈔五百萬錠以供其用旌表真定路藁城縣董氏婦貞節壬申命陝西行省平章政事卜谷失里爲總兵官癸酉享于太廟以皇第二子育於太尉衆家奴家賜衆家奴及乳母鈔各一千錠甲戌重建穆清閣乙亥命中書右丞禿禿以兵討商州賊丙子方國珍復降以司農司舊署賜哈麻庚辰中書省臣言近立分司農司宜於江浙淮東等處召募能種水田及脩築圍堰之人各一千名爲農師教民播種宜降空名

添設職事勅牒一十二道遣使賫往其地有能募農民一百名者授正九品二百名者正八品三百名者從七品即書填流官職名給之就令管領所募農夫不出四月十五日俱至田所期年爲滿即放還家其所募農夫每名給鈔十錠從之以杜乘彝爲中書叅知政事乙酉太陰犯太微垣丙戌以武衛所管鹽臺屯田八百頃除軍見種外荒閑之地盡付分司農司谷失八都魯克復襄陽樊城有功陞四川行省右丞賜金繫腰一庚寅知樞密院事老章克復南陽唐州賜金一錠銀一十錠鈔一千錠幣帛各五十匹戊戌

熒惑太白辰星聚於奎宿二月丁未祭先農己酉太
陰犯軒轅庚戌太白犯熒惑壬子太陰犯太微垣甲
寅中書省臣言徐州民願建廟宇生祠右丞相脫脫
從之詔仍立脫脫平徐勲德碑壬戌以宣政院使篤
憐帖木兒知經筵事中書右丞悟良哈台左丞烏古
孫良楨叅知政事杜秉彝並同知經筵事三月己卯
命脫脫領大司農司甲申詔脩大承天護聖寺賜鈔
二萬錠丁亥命脫脫以太師開府提調太史院回回
漢兒司天監己丑以各衙門係官田地并宗仁等衛
屯田地土並付司農分司播種是月會州定西靜寧
莊浪等州地震命江浙行省左丞帖里帖木兒江南
行臺侍御史左荅納失里招諭方國珎夏四月戊戌
朔命南北兵馬司各分官一員就領通州瀋州直沽
等處巡捕官兵往來巡邏給分司印一同署事半載
一更特命烏古孫良楨得用軍器庚子以禮部所轄
掌薪司并地土給付司農分司以甘肅行省平章政
事鎖南班爲永昌宣慰使總永昌軍馬仍給平章政
事俸先是永昌愚魯罷等爲亂鎖南班討平之至是
復起故有是命辛丑太白犯井宿乙巳時享太廟己
酉詔取勘徐州汝寧南陽鄧州等處荒田并戶絕籍

沒入官者立司牧署掌司農分司耕牛又立玉田屯
署降徐州路爲武安州以所轄縣屬歸德府其滕州
嶧州仍屬益都路辛亥太陰犯房宿是月車駕時巡
上都五月己巳命東安州武清大興宛平三縣正官
添給河防職名從都水監官巡視渾河隄岸或有損
壞即脩理之辛未江西行省左丞相亦憐真班江浙
行省左丞老老引兵取道自信州元帥韓邦彥哈迷
取道由徽州浮梁同復饒州蘄黃等賊聞風皆奔潰
癸酉以太尉阿剌吉爲嶺北行省左丞相知行樞密
院事伯家奴封武國公與諸王孛羅帖木兒同出軍

甲戌行樞密院添設僉院二員乙亥太陰犯歲星乙
未秦州白駒場亭民張士誠及其弟士德士信爲亂
陷秦州及興化縣遂陷高郵據之僭國號大周自稱
誠王建元天祐六月丙申朔立詹事院設詹事三員
同知二員副詹事二員丞二員命四川行省平章政
事王樞虎兒吐華便宜行事丁酉立皇子愛猷識達
達膺爲皇太子中書令樞密使授以金寶告祭天地
宗廟命右丞相脫脫兼詹事己亥詔征西都元都汪
只南發本處精銳勇敢軍一千人從征討以千戶二
員百戶一十員領之庚子知樞密院事失剌把都總

河南軍平章政事谷失八都魯總四川軍自襄陽分道而下克復安陸府辛丑罷宮傳府以所掌錢帛歸詹事院癸卯詔以勅牒二十道鈔五萬錠給付淮南行省平章政事達世帖睦爾於淮南淮北等處召募壯丁并總領漢軍蒙古守禦淮安遼東撈羊哈及乾帖困朮赤朮等五十六名吾者野人以皮貨來降給撈羊哈等三人銀牌一面管領吾者野人甲辰以立皇太子詔天下大赦己酉亦都護高昌王月魯帖木兒薨于南陽軍中命其子桑哥襲亦都護高昌王爵辛亥親王完者禿泰州陣亡八禿亳州陣亡各賻鈔

五百錠命前河西廉訪副使也先不花為淮西添設宣慰副使討秦州丙辰詔皇太子位下立儀衛司設指揮二員給二珠金牌副指揮二員一珠金牌賜吳王撈思監金一錠銀五錠鈔二千錠幣帛各九匹以資政院所轄左右都威衛屬詹事院是月命淮南行省平章政事達世帖睦爾便宜行事詔淮南行省平章政事福壽討興化是夏薊州大水秋七月丁卯泉州天雨白絲海潮日三至時享太廟戊辰太白晝見宦官至一品二品者依常例給俸祿壬申湖廣行省參知政事阿魯輝復武昌及漢陽府癸酉詔詹事院

自行銓注本院屬官壬辰親王只兒哈忽薨于海寧
軍中以其子寶童繼襲王爵八月癸卯親王闊兒吉
惠帖木兒獻馬辛亥賜脫脫東泥河田二十二頃親
王只兒哈郎討捕金山賊薨于軍中命其子秃魯帖
木兒入備宿衛庚申命不花帖木兒襲封文濟王是
月車駕還上都資政院使脫火赤以兵復江州路
以四川行省平章政事王樞虎兒吐華右丞完者不
花守鎮中興路左遷平章政事咬住為淮西元帥供
給烏撒軍進討蘄黃九月乙丑朔日有食之乙亥以
怯薛官廣平王咬咬征討慢功削其王爵降為河

行省平章政事己丑廣寧王渾都帖木兒薨賜鈔二
千錠建皇太子鹿頂殿于聖安殿西孟刺歹桑哥失
里獻馬一百匹賜金繫腰一幣帛各九庚寅太陰犯
熒惑辛卯扎你別之地獻大撒哈刺察赤兒米西兒
刀弓鎖子甲及青白西馬各二匹賜鈔二萬錠壬辰
太白經天熒惑犯左執法南臺御史大夫納麟以老
疾辭職從之命太尉如故丁酉享于太廟庚子太白
經天冬十月癸卯以江浙行省叅知政事買住丁陸
本省右丞提調明年海運甲辰歲星犯氏宿丁未廣
西元帥甄崇福復道州誅賊將周伯顏庚戌從帖里

帖木兒左答納失里之請授方國珍徽州路治中國
璋廣德路治中國瑛信州路治中督遣之任國珍疑
懼不受命立水軍都萬戶府於崑山州以浙東宣慰
使納麟哈刺爲正萬戶宣慰使董搏霄爲副萬戶庚
申賜皇太子妃鈔十萬錠壬戌賜皇太子五愛馬怯
薛丹二百五十人鈔各一百一十錠癸亥太白犯亢
宿是月撤世祖所立禮殿改建殿宇十一月壬申太
陰犯壘壁陣乙酉立典藏庫貯皇太子錢帛丁亥江
西右丞火你赤以兵平富州臨江遂引兵復瑞州是
日立義兵千戶水軍千戶於江西事平願還爲民

者聽十二月丁酉太白犯東咸己亥寧王旭滅該還
大幹耳朶思賜金繫腰一鈔一千錠庚子熒惑入氏
宿癸卯脫脫請以趙完普家產田地賜知樞密院事
桑哥失里庚戌京城天無雲而雷鳴少頃有火見于
東南懷慶路及河南府西北有聲如擊鼓者數四已
而雷聲震地癸丑以西安王阿剌忒納失里爲豫王
弟答兒麻討南陽賊有功以西安王印與之命鎮寵
吉兒之地丁巳太陰犯心宿西寧王牙罕沙鎮四川
還沙州賜鈔一千錠是月大同路疫死者太半江浙
行省平章政事卜顏帖木兒南臺御史中丞蠻子海

牙及四川行省叅知政事哈臨禿左丞桑禿失里西
 寧王牙罕沙合軍討徐壽輝於蘄水敗之壽輝遁走
 獲其偽官四百餘人陝西行省平章政事孛羅四川
 行省右丞荅失八都魯復均房等州詔孛羅等守之
 荅失八都魯討東正陽是歲自六月不雨至于八月
 造清寧殿前山子月宮諸殿宇以宦官留守也先帖
 木兒留守同知也速迭兒及都水少監陳阿木哥等
 董其役哈麻及禿魯帖木兒等陰進西天僧于帝行
 房中運氣之術號演揲兒法又進西番吐蕃秘密法
 帝皆習之

十四年春正月甲子朔汴梁城東汴河冰皆成五色
 花華如繪畫三日方解乙丑熒惑犯歲星丁卯太白
 犯建星辛未享于太廟壬申命帖木兒不花襲封廣
 寧王賜鈔一千錠癸酉熒惑犯房宿立遼陽等處漕
 運庸田使司屬分司農司丁丑帝謂脫脫曰朕嘗作
 朵思哥兒好事迎白金蓋遊皇城實為天下生靈之
 故今命刺麻選僧一百八人仍作朵思哥兒好事凡
 所用物官自給之毋擾于民丙戌以荅兒麻監感遙
 授陝西行省平章政事實授行宣政院使整治西番
 人民是月命桑哥失里哈臨禿守中興荅失八都魯

復峽州二月戊戌祭社稷乙卯命中書平章政事擢
思監提調規運總管府戊午太白犯壘壁陣己未以
湖廣行省平章政事苟兒爲淮南行省平章政事以
兵攻高郵是月以呂思誠爲湖廣行省左丞命湖廣
行省右丞伯顏普化江南行臺中丞蠻子海牙江浙
行省平章政事卜顏帖木兒參知政事阿里溫沙會
合湖廣行省平章政事也先帖木兒討沿江賊立鎮
江水軍萬戶府命江浙行省右丞佛家間領之詔河
南淮南兩省並立義兵萬戶府建清河大壽元忠國
寺以江浙廢寺曰歸之三月癸亥朔日有食之己巳

廷試進士六十二人賜薛朝晤牛繼志進士及第餘
授官出身有差壬申以皇太子行幸和買駝馬甲戌
命親王速哥帖木兒以兵討宿州賊丙子潁州陷是
月中書定擬義兵立功者權任軍職事平授以民職
從之命四川行省右丞谷失八都魯陞本省平章政
事兼知行樞密院事總荆襄諸軍從宜調遣詔和買
馬于北邊以供軍用凡有馬之家十匹內和買二匹
每匹給鈔一十錠夏四月癸巳朔汾州介休縣地震
泉湧以武棋叅議中書省事是月車駕時巡上都江
西湖廣大饑民疫癘者甚衆御史臺臣糾言江浙行

省左丞帖里帖木兒等罪先是帖里帖木兒與江南
行臺侍御史左蒼納失里奉旨招諭方國珍報國珍
已降乞立巡防千戶所朝廷授以五品流官令納其
船散遣徒衆國珍不從擁船一千三百餘艘仍據海
道阻絕糧運以故歸罪二人以江浙行省參知政事
阿兒溫沙陞本省右丞浙東宣慰使恩寧普爲江浙
行省參知政事皆總兵討方國珍發陝西軍討河南
賊給鈔令自備鞍馬軍器合二萬五千人馬七千五
百匹永昌鞏昌沿邊人匠雜戶亦在遣中造過街塔
於蘆溝橋命有司給物色人匠以御史大夫也先不

花督之復立應昌全寧二路先是有詔罷之以撥屬
魯王馬其沙王傅府至是有司以爲不便復之詔復
起永昌鞏昌喃巴臨洮等處軍命各衛軍人脩白浮
瓮山等處隄堰五月甲子安豐正陽賊圍廬州是月
詔脩砌北巡所經色澤嶺黑石頭河西沿山道路剏
建龍門等處石橋皇太子徙居宸德殿命有司脩葺
之立南陽鄧州等處毛胡蘆義兵萬戶府募土人爲
軍免其差役令討賊自効因其鄉人自相團結號毛
胡蘆故以名之詔以玉樞虎兒吐華募兵萬人下蜀
江代蒼失八都魯守中興荆門命蒼失八都魯以兵

赴汝寧陞湖廣行省叅知政事阿兒灰爲右丞討廬
州募寧夏善射者及各處回回木忽殷富者赴京師
從軍復發禿卜軍萬人命太傅阿刺吉領之命荆王
答兒麻失里代闊瑞阿合鎮河西討西番賊六月辛
卯朔薊州雨雹高郵張士誠寇揚州丙申達識帖睦
爾以兵討張士誠敗績諸軍皆潰詔江浙行省叅知
政事佛家問會達識帖睦爾復進兵討之甲辰太陰
入斗宿己酉盱眙縣陷庚戌泗州官軍潰秋七月
甲子潞州襄垣縣大風拔木偃禾乙丑太陰犯角宿
壬申詔免大都上都興和三路今年統糧命刑部尚

書阿魯於海寧州等處募兵討泗州壬午太陰
宿是月汾州孝義縣地震八月真寧路榆次縣桃李
花車駕還自上都九月己未朔賜親王撒蠻答失金
二錠銀二十錠鈔一萬錠幣帛表裏各三百匹創設
奧刺赤二十名仍給衣糧草料庚申以湖廣行省左
丞呂思誠復爲中書左丞辛酉以知樞密院事月赤
察兒爲中書平章政事詔脫脫以太師中書右丞相
總制諸王各愛馬諸省各翼軍馬董督總兵領兵大
小官將出征高郵甲子封高麗國王脫脫不花爲瀋
王丁卯普顏忽都皇后母歿賻鈔三百錠立寧宗影

堂戊子免河南蒙古軍人雜泛差役是月賜穆清閣
工匠皮衣各一領蓋海青鷹房禁河南淮南酒階州
西番賊起遣兵擊之方國珣拘執元帥也忒迷失黃
巖州達魯花赤宋伯顏不花知州趙宜浩以俟詔命
冬十月甲午享于太廟戊戌詔荅失八都魯及秦不
花等會軍討安豐甲辰詔加號海神爲輔國護聖庇
民廣濟福惠明著天妃壬子太陰犯太微垣十一月
丙寅勅中書省樞密院御史臺凡奏事先啓皇太子
詔江浙應有諸王公王后妃寺觀官員撥賜田糧及
江淮財賦稻田營田各提舉司糧盡數赴倉聽候
運以備軍儲價錢依本處十月時估給之丁卯脫脫
領大兵至高郵辛未戰于高郵城外大敗賊衆丙子
太陰犯鬼宿癸未賜親王喃荅失金鍍銀印乙酉脫
脫遣兵平六合縣是月荅失八都魯復苗軍所據鄭
均許三州皇太子修佛事釋京師死罪以下囚十二
月辛卯絳州北方有紅氣如火蔽天丙申以中書平
章政事定住爲左丞相宣政院使哈麻永昌宣慰鎖
南班並爲中書平章政事進階光祿大夫監察御史
袁賽因不花等劾奏脫脫出師三月略無寸功傾國
家之財以爲己用半朝廷之官以爲自隨又其弟也

先帖木兒庸材鄙器玷汙清臺綱紀之政不脩貪淫之心益著章三上詔令也先帖木兒出都門聽旨以宣徽使汪家奴爲御史大夫丁酉詔以脫脫老師費財已逾三月坐視寇盜恬不爲意削脫脫官爵安置淮安路第御史大夫也先帖木兒安置寧夏路以河南行省平章政事秦不花爲本省左丞相中書平章政事月闊察兒加太尉集賢大學士雪雪知樞密院事一同總兵總領諸處征進軍馬并在軍諸王駙馬省院臺官及大小出軍官負其滅里卜亦失你山哈八兒秃哈怯來等後都兒云都亦秃兒怯里兀堂

西番軍人各愛馬朵憐赤高麗回回民義丁壯等軍人並聽總兵官節制詔被災殘破之處令有司賑恤仍蠲租稅三年賜高年帛罷庸田茶運寶泉等司戊戌以定住領經筵事中院使桑哥失里爲中書添設右丞己亥太陰掩昴宿庚子以桑哥失里同知經筵事冀國公秃魯加太尉進階金紫光祿大夫癸卯命哈麻提調經正監都水監會同館知經筵事就帶元降虎符甲辰以桑哥失里提調宣文閣哈麻兼大司農呂思誠兼司農卿提調農務己酉紹興路地震是月命織造世祖御容詔威順王寬徹普化還鎮湖廣

先是以賊據湖廣命奪其王印至是寬徹普化討賊
累立功故詔還其印仍守舊鎮命甘肅右丞嵬的討
捕西番賊荅失八都魯復河陰鞏絲徭賊自耒陽寇
衡州萬戶許脫因死之是歲詔諭民間私租太重以
七分爲率普減二分永爲定例降鈔十萬錠賞江西
守城官吏軍民京師大饑加以疫癘民有父子相食
者帝於內苑造龍船委內官供奉少監塔思不花監
工帝自製其樣船首尾長一百二十尺廣二十尺前
瓦簾棚穿廊兩暖閣後吾殿樓子龍身并殿宇用五
彩金粧前有兩爪上用水手二十四人身衣紫衫金

荔枝帶四帶頭巾於船兩旁下各執篙一自後宮至
前宮山下海子內往來游戲行時其龍首眼口爪尾
皆動又自製宮漏約高六七尺廣半之造木爲匱陰
藏諸壺其中運水上下匱上設西方三聖殿匱腰立
玉女捧時刻籌時至輒浮水而上左右列二金甲神
人一懸鐘一懸鉦夜則神人自能按更而擊無分毫
差當鐘鉦之鳴獅鳳在側者皆翔舞匱之西東有日
月宮飛僊六人立宮前遇子午時飛僊自能耦進度
僊橋達三聖殿已而復退立如前其精巧絕出人謂
前代所鮮有時帝怠於政事荒于游宴以宮女三聖

奴妙樂奴文殊奴等一十六人按舞名爲十六天魔
首垂髮數辨戴象牙佛冠身被纓絡大紅絹金長短
裙金雜襖雲肩合袖天衣綬帶鞋鞮各執加巴刺般
之器內一人執鈴杵奏樂又宮女一十一人練槌髻
勒帕常服或用唐帽窄衫所奏樂用龍笛頭管小鼓
箏箏琵琶笙胡琴響板拍板以宦者長安迭不花管
領遇宮中讚佛則按舞奏樂官官受秘密戒者得入
餘不得預

紀卷第四十三

紀卷第四十四

元史四十四

翰林學士帝大夫知制誥兼修國史臣宋濂翰林待制承直郎知制誥兼國史院編官臣王禕等奉
勅修

順帝七

十五年春正月戊午朔以中書平章政事搠思監提
調留守司宣徽使黑斯爲中書平章政事河南行省
左丞許有壬爲集賢大學士遼陽行省左丞奇伯顏
不花陞本省平章政事壬戌以宣政院副使忻都爲
太子詹事癸亥享于太廟甲子親王禿堅帖木兒歿
于軍中賜鈔五百錠江西行省平章政事道童加大

司徒戊辰太陰犯五車辛未太陰犯鬼宿大幹耳朶
儒學教授鄭咍建言蒙古乃國家本族宜教之以禮
而猶循本俗不行三年之喪又收繼庶母叔嬪兄嫂
恐貽笑後世必宜改革繩以禮法不報丙子上都饑
賑糴米二萬石丁丑徐壽輝僞將倪文俊復陷沔陽
府威順王寬徹普化令王子報恩奴等同湖南元帥
阿思藍水陸並進討之至漢川水淺文俊用火筏燒
船報恩奴遇害庚辰復設仁虞雲需尚供三總管府
丙戌大同路饑出糧一萬石減價糴之是月詔以湖
廣行省平章政事乞剌班慢功削其官爵令從軍自

効詔安置脫脫于亦集乃路收所賜田土命河南行
省參知政事洪丑驢守禦河南陝西行省參知政事
述律朶兒只守禦潼關宗王扎牙失里守禦興元陝
西行省參知政事阿魯溫沙守禦商州通政院使朶
來守禦山東詔豫王阿剌忒納失里與陝西行省平
章政事搠思監從宜商議軍事閏月壬寅以各衛軍
人屯田京畿人給鈔五錠以是日入役日支鈔二兩
五錢仍給牛種農器命司農司令本管萬戶督其勤
惰丙午太陰犯心宿丙辰太白經天是月上都路饑
詔嚴酒禁命河南行省參知政事塔失帖木爾領元

管陝西軍馬守禦河南二月己未劉福通等自礪山
夾河迎韓林兒至立為皇帝又號小明王建都亳州
國號宋改元龍鳳以其母楊氏為皇太后杜遵道盛
文郁為丞相羅文素劉福通為平章劉六知樞密院
事拆鹿邑縣太清宮材建宮闕遵道等各遣子入侍
遵道得寵專權劉福通疾之命甲士搃殺遵道福通
遂為丞相後稱太保丙寅以中書平章政事黑廝左
丞許有壬並知經筵事戊辰命太傅御史大夫汪家
奴為中書右丞相中書平章政事定住為左丞相詔
天下庚午以河南行省平章政事咬咬為遼陽行省

左丞相壬申立淮東等處宣慰使司都元帥府于天
長縣統濠泗義兵萬戶府并洪澤等處義兵聽富民
願出丁壯義兵五千名者為萬戶五百名者為千戶
一百名者為百戶仍降宣勅牌面丙子以達識帖睦
迺為中書平章政事提調留守司平章政事黑廝兼
大司農是月命刑部尚書董鈗等與江西行省平章
政事火你赤專任征討之務便宜從事遣使先降曲
赦諭以禍福如能出降釋其本罪執迷不悛剋日進
討三月庚寅太陰犯五車癸巳徐壽輝兵陷襄陽路
甲午命汪家奴攝太尉持節授皇太子愛猷識理達

臘王冊錫以冕服九旒祇謁太廟丙申太陰犯房宿
辛丑以監察御史言安置脫脫于雲南鎮西路也先
帖木兒于四川碉門脫脫長男哈刺章安置肅州次
男三寶奴安置蘭州仍藉其家產己酉命知樞密院
事衆家奴知經筵事知樞密院事捏兀失該提調內
史府癸丑太白經天夏四月壬戌中書省臣言江南
因盜賊阻隔所在闕官宜遣人與各省及行臺官以
廣東廣西海北海南三品以下通行遷調五品以下
先行照會之任江浙行省三年一次遷調福建等處
闕官亦依前例從之命彰德等處分樞密院添設同
知副使都事各一員癸亥以中書平章政事達識帖
睦邇知經筵事命樞密院添設僉院一員判官二員
直沽分樞密院添設副使一員都事一員以御史中
丞扎撒兀孫同知經筵事乙丑以中書右丞威卜左
丞烏古孫良楨分省彰德辛未命御史中丞伯家奴
同知經筵事中書參議成遵兼經筵官癸酉以左丞
相定住爲右丞相平章政事哈麻爲左丞相太子詹
事桑哥失里爲中書平章政事雪雪爲御史大夫丁
丑加知樞密院事衆家奴太傅辛巳親王脫脫薨賜
鈔二百錠是月車駕時巡上都詔翰林待制烏馬兒

集賢待制孫撫招安高郵張士誠仍賚宣命印信牌面與鎮南王孛羅不花及淮南行省廉訪司等官商議給付之御史臺劾奏中書左丞呂思誠罷之詔四川等處立宣化鎮南軍民府改四川忠孝軍民府爲忠孝軍民安撫司罷盤順府改立盤順軍民安撫司罷四川羊毋甲洞臭南王洞長官司改立忠義軍民安撫司立汴梁等處義兵萬戶府五月壬辰復襄陽路監察御史也里忽都等劾奏河南行省左丞相太不花慢功虐民詔削其官職仍令率領火赤溫從總兵官平章政事答失八都魯征進答失八都魯管領

太不花一應軍馬庚戌倪文俊自沔陽陷中興路元帥朶兒只班死之是月命淮南行省平章政事咬住淮東廉訪使王也先迭兒撫諭高郵六月丙辰命御史大夫雪雪提調端本堂癸亥太白經天丁卯監察御史哈林禿劾奏脫脫之師集賢大學士吳直方及真參軍黑漢長史火里赤等並宜追奪從之監察御史歪哥等辯明中書左丞呂思誠給付元追所授宣命玉帶戊辰命中書平章政事搠思監兼大司農桑哥失里知經筵事己巳靖安王闊不花薨無後命其孀襲封靖安王癸酉以四川行省平章政事答失八

都魯爲河南行省平章政事乙亥命將作院判官烏
馬兒招安濠泗等處章佩監丞普顏帖木兒招安沔
陽等處諸王倒吾沒於軍中賻鈔二百錠丁丑保德
州地震已卯陝西行省平章政事禿禿加答刺罕庚
辰徵徽州隱士鄭玉爲翰林待制不至江浙省臣言
至正十五年稅課等鈔內除詔書已免稅糧等鈔較
之年例海運糧并所支鈔不敷乞減海運以甦民力
戶部定擬本年稅糧除免之外其寺觀并撥賜田糧
十月開倉盡行拘收其不敷糧撥至元折中統鈔一
百五十萬錠於產米處糴一百五十萬石貯瀕河之

倉以聽撥運從之癸未中書參知政事實理門言舊
立蒙古國子監專教四怯薛并各愛馬官貢子弟今
宜諭之依先例入學俾嚴爲訓誨從之是月

大明皇帝起兵自和州渡江取太平路自紅巾妖寇
倡亂之後南北郡縣多陷沒故

大明從而取之荊州大水命湖廣行省平章政事阿
魯灰領軍與淮南行省平章政事蠻子海牙淮西道
宣慰使完者不花以兵攻和州等處命郡王只兒墩
伯湖廣行省右丞卜蘭奚攻討河南以湖廣行省平
章政事咬住爲總兵官領本省軍馬并江州揚完者

黃州李勝等軍守禦湖廣江浙行省參知政事納麟
哈刺統領水軍萬戶等軍會本省平章政事定定進
攻常州鎮江等處命將作院判官烏馬兒利用監丞
八十奴招諭濠泗淮南行省左丞相太平助之章佩
監丞普顏帖木兒翰林脩撰烈瞻招諭沔陽四川行
省平章政事王樞虎兒吐華等助之以怯薛丹潑皮
等六十名從江南行御史臺大夫福壽守禦集慶路
國王朶兒只薨于揚州軍中命郡王只兒墩伯管領
其所部軍馬秋七月辛卯享于太廟壬寅倪文俊復
陷武昌漢陽等路是月命親王失里門以兵守曹州

山東宣慰馬某火者以兵分府沂州莒州等處命知
樞密院事答兒麻監藏及四川行省左丞沙刺班湖
南同知宣慰使劉答兒麻失里以兵屯中興招諭諸
處有不降者與親王秃魯及王樞虎兒吐華討之命
湖廣行省平章政事桑哥亦秃渾及秃秃守禦襄陽
參知政事哈林秃及王塔失帖木爾守禦沔陽如賊
徒不降即進兵討之陞台州海道巡防千戶所為海
道防禦運糧萬戶府八月庚申命南陽等處義兵萬
戶府召募毛胡蘆義兵萬人進攻南陽戊辰以中書
平章政事達識帖睦爾為江浙行省左丞相便宜行

事賜鈔一千錠甲戌以大宗正府扎魯忽赤迭里迷失爲甘肅行省平章政事戊寅太白經天雲南死可伐等降令其子莽三以方物來貢乃立平緬宣撫司四川向思勝降以安定州改立安定軍民安撫司是月車駕還自上都詔淮南行省左丞相太平統淮南諸軍討所陷郡邑仍命湖廣行省平章政事阿魯灰以所部苗軍聽其節制立吾者野人乞列迷等處諸軍萬戶府于哈兒分之地命親王寬徹班守興元永昌宣慰使完者帖木兒討西番賊以淮南行省平章政事蠻子海牙與同知樞密院事絆住馬等自蕪湖

至鎮江南岸守禦同阿魯灰所部軍馬協力衛護江南行省命答失八都魯從便調度湖廣行省左丞卜蘭奚所領苗軍江浙行省平章政事卜顏帖木兒守禦蘄黃蘭溪等處九月癸未命搠思監提調武衛以知嶺北行樞密院事紐的該爲中書平章政事乙酉立分海道防禦運糧萬戶府于平江路己丑太白犯太微垣辛卯命秘書卿答蘭提調別吉太后影堂祭祀知樞密院事野仙帖木兒提調世祖影堂祭祀宣政院使蠻子提調裕宗英宗影堂祭祀己亥倪文俊圍岳州路壬子命桑哥失里提調宣文閣呂思誠知

經筵事集賢大學士許有壬兼太子諭德是月移置脫脫于阿輕乞之地命答失八都魯移軍住陳留冬十月丁巳立淮南行樞密院于揚州己未太陰犯壘壁陣甲子命兵工二部尚書撒八兒王安童以金銀牌一百六十五面給淮東宣慰使司等處義兵官員命哈麻領大司農司帝謂右丞相定住等曰敬天地尊祖宗重事也近年以來關於舉行當選吉日朕將親祀郊廟務盡誠敬不必繁文卿等其議典禮從其簡者行之遂命右丞幹藥左丞呂思誠領其事以中書右丞拜住為平章政事庚午以襲封衍聖公孔克

堅同知太常禮儀院事以克堅子希學為襲封衍聖公癸酉太陰犯軒轅哈麻奏言郊祀之禮以太祖配皇帝出宮至郊祀所便服乘馬不設內外儀仗教坊隊子齋戒七日內散齋四日於別殿致齋三日二日於大明殿西幄殿一日在南郊祀所丙子以郊祀命皇太子愛猷識理達臘祭告太廟己卯以翰林學士承旨慶童為淮南行省平章政事立黃河水軍萬戶府于小清口十一月甲申焚惑犯氏宿庚寅填星犯井宿壬辰親祀上帝于南郊以皇太子愛猷識理達臘為亞獻攝太尉右丞相定住為終獻甲午以太不

元史紀事本末卷四十四
花爲湖廣行省左丞相總兵招捕湖廣沔陽等處湖
廣荆襄諸軍悉聽節制給還元追奪河南行省丞相
宣命仍給以功賞宣勅金銀牌面戊戌介休縣桃杏
花已亥太陰犯鬼宿戊申右丞相定住以病辭職命
以太保就第治病庚戌賊陷饒州路辛亥賜高麗國
王伯顏帖木兒爲親仁輔義宣忠奉國彰惠靖遠功
臣是月答失八都魯攻夾河賊大破之賊陷懷慶命
河南行省右丞不花討之以湖廣歸州改隸四川行
省十二月壬子朔熒惑犯房宿給湖廣行省分省印
丁巳命中書參知政事月倫失不花陳敬伯分省彰

德癸亥立忠我忠勤萬戶府于宿州武安州己巳以
諸郡軍儲供餉繁浩命戶部印造明年鈔本六百萬
錠給之壬申以平章政事帖里帖木兒右丞幹藥並
知經筵事參議丁好禮兼經筵官乙亥以天下兵起
下詔罪己大赦天下是月答失八都魯大敗劉福通
于太康遂圍亳州僞宋主遁于安豐立興元等處
宣慰使司都元帥府于興元路是歲薊州雨血詔凡
有水田之處設大兵農司招集人夫有警乘機進討
無事栽植播種詔濬大內河道以宦官同知留守埜
元帖木兒董其役埜先帖木兒言自十一年以來天

下多事不宜與作帝怒命往使高麗改命宦官答失蠻董之以中書平章政事拜住分省濟寧設四部是歲察罕帖木兒與賊戰于河南北屢有功除中書刑部侍郎

十六年春正月壬午改福建宣慰使司都元帥府爲福建行中書省戊子親享太廟命中書平章政事帖里帖木兒提調國子監己丑太陰犯昴宿丁酉太保定住以病辭職太尉太宗正府扎魯忽赤月闕察兒以出軍中傷辭職皆不允乙亥詔命太尉阿吉刺開府設官屬乙巳以遼陽行省左丞相咬咬爲太子詹

事翰林學士承旨朶列帖木兒同知詹事院事丙子

以知樞密院事實理門蕪大府監卿戊申雲南土官阿蘆降遣姪腮幹以方物來貢庚戌左丞相哈麻罷辛亥御史大夫雪雪亦罷以搠思監爲御史大夫復以定住爲右丞相是月蘆州地震倪文俊建僞都于漢陽迎徐壽輝據之二月癸酉禿魯帖木兒辭職不允搠思監糾言哈麻及其弟雪雪等罪惡帝曰哈麻兄弟雖有罪然侍朕日久與朕弟懿璘質班皇帝實同乳且緩其罰令之出征自效甲寅命右丞相定住依前太保中書一切機務悉聽總裁詔天下丙辰以

鎮南王孛羅不花自兵興以來率怯薛丹討賊累立戰功賜鈔一萬錠定住及平章政事桑哥失里等復奏哈麻兄弟罪惡遂命貶哈麻惠州安置雪雪肇州安置尋杖殺之壬戌詹事伯撒里辭職乙丑禁銷毀販賣銅錢丙寅命翰林國史院太常禮儀院定擬皇后竒氏三代功臣謚號王爵甲戌命六部大司農司集賢翰林國史兩院太常禮儀院秘書崇文國子都水監侍儀司等正官各舉才堪守令者一人不拘蒙古色目漢南人從中書省斟酌用之或任內害民受賊者舉官量事輕重降職命蠻蠻爲靖安王賜金印

置王傅等官己卯命集賢直學士楊俊民致祭曲阜孔子廟仍葺其廟宇詔諭山東鹽法軍民毋得沮壞賜定住薦憐赤怯薛丹三十名給衣糧馬疋草料是月高郵張士誠陷平江路據之改平江路爲隆平府遂陷湖州松江常州三月辛巳復立酒課提舉司命中書平章政事帖里帖木兒叅知政事成遵等議鈔法壬午徐壽輝復寇襄陽癸未臺臣言係官牧馬草地俱爲權豪所占今後除規運總管府見種外餘盡取勘令大司農召募耕墾歲收租課以資國用從之丁亥以今秋出師詔和買馬六萬疋戊子命宣讓王

帖木兒不花威順王寬徹普化以兵鎮遏懷慶路各賜金一錠銀五錠幣帛九疋鈔二千錠庚寅

大明兵取集慶路江南行臺御史大夫福壽死之丙申倪文俊陷常德路總兵官俺都剌遁命搠思監提調承徽寺丁酉立行樞密院于杭州命江浙行省左相達識帖睦爾兼知行樞密院事節制諸軍省院等官並聽調遣凡賞功罰罪招降討逆許以便宜行事

事

大明兵取鎮江路戊申方國珣復降以爲海道運糧漕運萬戶兼防禦海道運糧萬戶其兄方國璋爲衢

州路總管兼防禦海道事是月有兩日相盪夏四月辛亥以搠思監爲中書左丞相丙辰以資正院使普化爲御史大夫丁巳命左丞相搠思監領經筵事中書平章政事悟良哈台御史大夫普化並知經筵事庚申以河南行省左丞卜蘭奚爲湖廣行省平章政事答失八都魯加金紫光祿大夫丙寅命阿因班太子與陝西行省官同討均房南陽遼陽行省平章政事竒伯顏不花加大司徒丁卯以陝西行臺御史大夫朶朶爲陝西行省左丞相大司農咬咬爲遼陽行省左丞相以知樞密院事實理門分院濟寧翰林學

元史紀事本末卷四十四
士承旨脫脫同知詹事院事壬申命豫王阿剌忒納
失里與陝西行省官商議軍機從宜攻討己卯命悟
良哈台兼太子諭德是月車駕時巡上都五月壬辰
太白犯鬼宿癸巳亦如之甲午太陰入斗宿丙申倪
文俊陷澧州路丁酉太陰犯壘壁陣乙巳賊寇辰州
守將和尚以鄉兵擊敗之六月甲寅江浙行省平章
政事三旦八參知政事楊完者以兵守嘉興路禦張
士誠乙丑

大明兵取廣德路秋七月癸未以翰林學士禿魯帖
木兒爲侍御史丁酉太陰犯壘壁陣是月張士誠遣

兵陷杭州江浙行省平章政事左答納失里戰死丞
相達識帖睦爾遁楊完者及萬戶普賢八不擊敗之復
其城八月丙辰奉元路判官王淵等以義兵復商州
陞淵同知關商襄鄧等處宣慰司事己未賊侵河南
府路參知政事洪丑驢以兵敗之丁卯太陰犯昴宿
庚午倪文俊陷衡州路元帥甄崇福戰死甲戌彗星
見張宿色青白彗指西南長尺餘至十二月戊午始
滅是月車駕還自上都黃河決山東大水九月庚辰
汝潁賊李武崔德等破潼關參知政事述律杰戰死
壬午豫王阿剌忒納失里同知樞密院事定住引兵

復潼關河南行省平章政事伯家奴以兵守之丙申
潼關復陷伯家奴兵潰豫王阿剌忒納失里復以兵
取之李武崔德敗走戊戌賊陷陝州及魏州詔以太
尉納麟復爲江南行臺御史大夫遷行臺治紹興是
月察罕帖木兒復陝州及魏州復龍襄敗賊兵于平陸
安邑以功由兵部尚書陞僉河北行樞密院事冬十
月丁未大名路有星如火從東南流芒尾如曳箕墮
地有聲火燄蓬勃久之乃息化爲石青黑色光瑩形
如狗頭其斷處如新割者命藏于庫壬辰太陰犯井
宿是月詔罷太尉也先帖木兒十一月丙戌以老的

沙答里麻失並爲詹事丁亥流星大如酒盃色青白
尾跡約長五尺餘光明燭地起自東北東南行沒於
近濁有聲如雷壬辰太陰犯井宿是月河南陷河南
廉訪副使俺普遁置河南廉訪司于沂州又於沂州
設分樞密院以兵馬指揮使司隸之十二月倪文俊
陷岳州路殺威順王子歹帖木兒湖廣參知政事也
先帖木兒與左江義兵萬戶鄧祖勝合兵復衡州是
歲詔沿海州縣爲賊所殘掠者免田租三年賜高年
帛河南行省左丞相太不花駐軍于南陽嵩汝等州
叛民皆降軍勢大振陝西行臺監察御史李尚綱上

元史紀事本末卷四十四
關中形勝急論凡十有二事命大司農司屯種雄霸
二州以給京師號京糧

紀卷第四十四

紀卷第四十五

元史四十五

翰林學士大夫知制誥兼修國史長水瀛翰林待制承直郎同知制誥兼國史院編修官王禕等奉
勅修

順帝八

十七年春正月丙子朔日有食之以伯顏禿古思爲
大司徒辛卯命山東分省團結義兵每州添設判官
一員每縣添設主簿一員專率義兵以事守禦仍命
各路達魯花赤提調聽宣慰使司節制丙申監察御
史哈刺章言淮東道廉訪使楮不華徇忠盡節宜加
褒贈優恤其家從之二月壬子賊犯七盤藍田命察

罕帖木兒以軍會答兒麻亦兒守陝州潼關哈刺不
花由潼關抵陝西會豫王阿剌忒納失里及定住等
同進討癸丑太陰犯五車以征河南許亳太康嵩涉
大捷詔赦天下戊辰知樞密院事脫脫復邳州調客
省使撒兒答溫等攻黃河南岸賊大破之壬申劉福
通遣其黨毛貴陷膠州僉樞密院事脫歡死之甲戌
倪文俊陷峽州是月李武崔德陷商州察罕帖木兒
與李思齊以兵自陝號援陝西以察罕帖木兒為陝
西行省左丞李思齊為四川行省左丞詔以高寶為
四川行省參知政事將兵取中興不克賊遂破輓轆

閏三月乙亥義兵萬戶賽甫丁阿迷里丁叛據泉州
庚辰毛貴陷萊州守臣山東宣慰副使釋嘉訥死之
壬午

大明兵取常州路甲申太陰犯鬼宿壬辰歲星犯壘
壁陣甲午毛貴陷益都路益王買奴遁自是山東郡
邑皆陷乙未以江淮行樞密院副使董搏霄為山東
宣慰使丁酉毛貴陷濱州戊戌以中書平章政事帖
里帖木兒為御史大夫悟良哈台幹孛並為中書平
章政事夏四月丙午監察御史五十九言今京師周
圍雖設二十四營軍卒疲弱素不訓練誠為虛設儻

有不測誠可寒心宜速選擇驍勇精銳衛護大駕鎮守京師實營今莫安根本固堅人心之急務况武備莫重於兵而養兵莫先於食今朝廷撥降鈔錠措置農具命總兵官於河南克復州郡且耕且戰甚合寓兵於農之意為今之計權命總兵官從宜於軍官內選委能撫字軍民者兼路府州縣之職務要農事有成軍民得所則擾民之害亦除而匱乏之憂亦釋矣帝嘉納之乙卯毛貴陷莒州丙辰京師立便民六庫倒易昏鈔辛酉以咬咬為甘肅行省左丞相答失八都魯加太尉四川行省左丞相漢中道廉訪司糾陝西行省左丞蕭家奴遇賊逃竄失陷所守郡邑詔正其罪是月車駕時巡上都封江西行省平章政事火你赤為營國公

大明兵取寧國路五月乙亥命知樞密院事孛蘭奚進兵討山東戊寅平章政事亦老溫帖木兒復武安州等三十餘城丙申命搠思監為右丞相太平為左丞相詔天下免民今歲稅糧之半詔以永昌宣慰司屬詹事院六月甲辰朔以實理門為中書分省右丞守濟寧丙辰監察御史脫脫穆而言去歲河南之賊窺伺河北惟河南與山東互相策應為害尤大為今

元史紀事本末卷之五
三
之計中書當遴選能將就太不花荅失八都魯阿魯
三處軍馬內擇其精銳以守河北進可以制河南之
侵退可以攻山東之寇庶幾無虞從之己未以帖里
帖木兒老的沙並為御史大夫庚申

大明兵取江陰州壬申帖里帖木兒糾陝西知行樞
密院事也先帖木兒遂命罷陝西行樞密院令也先
帖木兒居于草地癸酉温州路樂清江中龍起颶風
作有火光如毬是月劉福通犯汴梁其軍分三道關
先生破頭潘馮長舅沙劉二王士誠寇晉冀白不信
大刀教李喜喜趨關中毛貴據山東其勢大振秋七

月己卯帖里帖木兒奏續集風憲宏綱庚辰

大明兵取徽州路癸未太白犯鬼宿甲申太陰犯斗
宿乙酉命右丞相搠思監領宣政院事平章政事威
卜知經筵事參知政事李穆同知經筵事參知政事
完者帖木兒兼太府卿丁亥填星犯鬼宿戊子以李
穆為御史中丞中書省臣言山東般陽益都相次而
陷濟南日危宜選將練卒信賞必罰為保燕趙計以
衛京師不報己丑鎮守黃河義兵萬戶田豐叛陷濟
寧路分省右丞實理門遁義兵萬戶孟本周攻之田
豐敗走本周還守濟寧甲午以御史中丞完者帖木

兒為中書右丞河南廉訪使俺普為中書參知政事
 監察御史迭里弥實劉傑言疆域日蹙兵律不嚴陝
 西汴梁淮潁山東之寇有窺伺燕趙之志宜俯詢大
 臣共圖克復之宜預定守備之策不報是月立四方
 獻言詳定使司秩正三品歸德府及曹州皆陷八月癸卯
 公權叛以城降于賊歸德府及曹州皆陷八月癸卯
 填星犯鬼宿太白犯軒轅癸丑劉福通兵陷大名路
 遂自曹濮陷衛輝路答失八都魯之子孛羅帖木兒
 與萬戶方脫脫擊之甲子太陰犯五車乙丑以陝西
 行臺御史中丞伯嘉訥為陝西行省平章政事淮南
 行省參知政事余闕為淮南行省左丞江浙行省參
 知政事楊完者陞左丞方國珙為江浙行省參知政
 事海道運糧萬戶如故丙寅慶陽府鎮原州大雹是
 月大駕還自上都薊州大水詔知樞密院事紐的該
 進討山東
 大明兵取揚州路平江路張士誠俾前江南行臺御
 史中丞蠻子海牙為書請降江浙左丞相達識帖睦
 迺承制令參知政事周伯琦等至平江撫諭之詔以
 士誠為太尉士德為淮南行省平章政事時士德已
 為

嘉靖九年補刊

元史紀事本末卷四十五

五

大明兵所擒九月丙子命同知樞密院事壽童以兵討冠州以老的沙爲中書省平章政事兼兀良海牙指揮使甲午澤州陵川縣陷縣尹張輔死之戊戌大不花復大名路并所屬郡縣辛丑詔中書右丞也先不花御史中丞成遵奉使宣撫彰德大名廣平東昌東平曹濮等處獎厲將帥是月命紐的該加太尉總諸軍守禦東昌時田豐據濟濮率衆來寇擊走之倪文俊謀殺其主徐壽輝不果自漢陽奔黃州壽輝僞將陳友諒襲殺之友諒遂自稱平章閏九月癸卯有飛星如盂青色光燭地星約長尺餘起自王良沒於

勾陳監察御史朶兒只等劾奏知樞密院使哈刺八禿兒失陷所守郡縣詔正其罪丙午太陰犯斗宿右丞相搠思監左丞相太平並加開府儀同三司平章政事完者不花兼大司農庚申太陰犯井宿乙丑路州陷丙寅賊攻翼寧察罕帖木兒以兵擊走之冬十月乙亥熒惑犯氐宿戊寅設分詹事院甲申太陰掩昴宿戊戌曹州賊入太行山是月白不信大刀敖李喜喜陷興元遂入鳳翔察罕帖木兒李思齊屢擊破之其黨走入蜀答失八都魯與知樞密院事答里麻失里以軍討曹州賊官軍敗潰答里麻失里死之靜

江路山崩地陷大水十一月辛丑山東道宣慰使董搏霄建言請令江淮等處各枝官軍分布連珠營寨於隘口屯駐守禦宜廣屯田以足軍食從之汾州桃花花壬寅賊侵壺關察罕帖木兒大破之戊午以河南行省平章政事答蘭為中書平章政事御史中丞李獻為中書左丞陝西行臺中丞卜顏帖木兒樞密院副使哈剌那海司農少卿崔敬侍御史陳敬伯皆為參知政事癸亥豫王阿剌忒納失里與陝西行省左丞相朶朶陝西行臺御史中丞伯嘉訥分道攻討關陝己巳以中書參知政事八都麻失里為右丞十

二月庚午熒惑犯天江辛未山東道廉訪使伯顏不花建言嚴保伍集勇健汰冗官戊寅太白犯歲星甲申太陰犯鬼宿丁亥歲星犯壘壁陣庚寅太白犯壘壁陣癸巳太陰犯心宿丁酉慶元路象山縣鵝鼻山崩己亥流星如金星大尾約長三尺餘起自太陰近東而沒化為青白氣庚子答失八都魯卒于軍中是歲詔天下團結義兵路府州縣正官俱兼防禦事詔淮南行知樞密院事脫脫領兵討淮南詔諭濟寧李秉彝田豐等令其出降叙復元任嘯亂士卒仍給資糧欲還鄉者聽倪文俊陷川蜀諸郡命偽元帥明玉

元史卷一百一十五
七
玆守據之趙君用及彭大之子早住同據淮安趙僭
稱末義王彭僭稱魯淮王義兵千戶余寶殺其知樞
密院事寶童以叛降于毛貴余寶遂據棣州河南大
饑

十八年春正月辛丑填星犯鬼宿乙巳察罕帖木兒
李思齊合兵于鳳翔丙午太陰犯昴宿陳友諒陷安
慶路守將余闕死之庚戌

大明兵取婺源州甲子以不蘭奚知樞密院事乙丑
大風起自西北益都土門萬歲碑仆而碎丙寅田豐
陷東平路丁卯不蘭奚與毛貴戰于好石橋敗績走

濟南是月詔答失八都魯子孛羅帖木兒爲河南行
省平章政事總領其父元管軍馬詔察罕帖木兒屯
陝西李思齊屯鳳翔二月己巳朔議團結西山寨大
小十一處以爲保障命中書右丞塔失帖木兒左丞
烏古孫良楨等總行提調設萬夫長千夫長百夫長
編立牌甲分守要害互相策應毛貴陷清滄州遂據
長蘆鎮中書省臣奏以陝西軍旅事劇務殷去京師
道遠供費艱難請就陝西印造寶鈔爲便遂分戶部
寶鈔庫等官置局印造仍命諸路撥降鈔本并平準
行用庫倒易昏弊布于民間癸酉毛貴陷濟南路守

將愛的戰死毛貴立賓興院選用故官以姬宗周等分守諸路又於萊州立三百六十屯田每屯相去三十里造大車百輛以挽運糧儲官民田十止收二分冬則陸運夏則水運乙亥填星犯鬼宿辛巳詔以太不花為中書右丞相總兵山東壬午田豐復陷濟寧路甲申輝州陷丙戌紐的該聞田豐逼近東昌棄城走丁亥察罕帖木兒調兵復涇州平涼保鞏昌戊子田豐陷東昌路庚寅王士誠自益都犯懷慶路周全擊敗之辛卯以安童為中書參知政事丁酉興元路陷三月己亥朔日色如血加右丞相搠思監太保庚

子毛貴陷般陽路辛丑大同路夜黑氣蔽西方有聲如雷少頃東北方有雲如火交射中天遍地俱見火空中有兵戈之聲癸卯王士誠陷晉寧路總管杜賽因不花死之甲辰察罕帖木兒遣賽因赤等復晉寧路己酉劉福通遣兵犯衛輝字羅帖木兒擊走之庚戌毛貴陷薊州詔徵四方兵入衛乙卯毛貴犯鄆州至棗林樞密副使達國珎戰死遂略柳林同知樞密院事劉哈刺不花以兵擊敗之貴走據濟南丙辰大明兵取建德路以周全為湖廣行省參知政事統奧魯等軍移鎮嵩州白龍寨翼寧路陷丁巳田豐陷

益都路辛酉大同諸縣陷察罕帖木兒遣關保等往擊之是時賊分二道犯晉冀一出沁州一侵絳州乙丑以考章爲太子少保夏四月甲申陳友諒陷龍興路省臣道童火你赤棄城遁壬午四豐陷廣平路大掠退保東昌詔令元帥方脫脫以兵復廣平癸未以諸處捷音屢至詔頒軍民事宜十一條庚寅以翰林學士承旨蠻子爲嶺北行省平章政事辛卯太白犯鬼宿甲午陳友諒遣王奉國陷瑞州路是月車駕時巡上都察罕帖木兒李思齊會宣慰張良弼郎中郭撰善宣慰同知拜帖木兒平章政事定住總帥汪長

生奴各以所部兵討李喜喜于鞏昌李喜喜敗入蜀察罕帖木兒駐清涼李思齊駐斜坡張良弼駐秦州郭擇善駐崇信拜帖木兒等駐通渭定住駐臨洮各自除路府州縣官徵納軍需李思齊張良弼又同襲殺拜帖木兒分總其兵五月戊戌朔察罕帖木兒遣董克昌等以兵復冀寧以方國珍爲江浙行省左丞兼海道運糧萬戶詔察罕帖木兒還兵鎮冀寧李思齊殺同僉樞密院事郭擇善庚子賊兵踰太行察罕帖木兒部將關保擊敗之以察罕帖木兒爲陝西行省右丞兼陝西行臺侍御史同知河南行樞密院事

劉福通攻汴梁壬寅太白犯填星汴梁守將竹貞棄
城遁福通等遂入城乃自安豐迎其僞主居之以爲
都陳友諒遣康泰趙琮鄧克明等以兵寇郟武路甲
辰命太尉阿吉刺爲甘肅行省左丞相乙巳関保與
賊戰于高平大敗之庚戌陳友諒陷吉安路壬子太
陰犯斗宿癸丑監察御史七十等糾劾太保中書右
丞相太不花乙卯詔削太不花官爵安置盖州時太
不花總兵山東以知行樞密院悟良哈台代之命悟
良哈台節制河北諸軍河南行省平章政事周全節
制河南諸軍辛酉陳友諒兵陷撫州路甲子監察御史七

十燕赤不花等劾中書參知政事燕只不花是月遼
州蝗山東地震天雨白毛察罕帖木兒自以劉尚質
爲冀寧路總管六月戊辰朔大不花伏誅察罕帖木
兒調虎林赤関保同守潞州拜察罕帖木兒陝西行
省平章政事便宜行事庚辰関先生破頭潘等陷遼
州虎林赤以兵擊走之関先生等遂陷冀寧路乙酉
命左丞相太平督諸軍守禦京城便宜行事是月汾
州大疫秋七月丁酉朔周全據懷慶路以叛附于劉
福通時察罕帖木兒駐軍洛陽遣伯帖木兒以兵守
盩子城周全來戰伯帖木兒爲其所殺周全遂盡驅

懷慶民渡河入汴梁丁未太陰犯斗宿不蘭奚以兵復般陽路已而復陷戊申太白晝見癸丑有賊兵犯京城刑部郎中不花守西門夜開門擊退之己未劉福通遣周全引兵攻洛陽守將登城以大義責全全愧謝退兵劉福通殺之丙寅以完卜花脫脫帖木兒為中書平章政事是月京師大水蝗民大饑八月丁卯朔江浙行省平章政事三旦八遁于福建先是三旦八討饒州貪財玩寇久而無功遂妄稱遷職福建行省至福建為廉訪僉事般若帖木兒所劾拘之興化路壬申太陰掩心宿庚辰陳友諒兵陷建昌路辛

巳義兵萬戶王信以滕州叛降於三旦八甲申太陰掩

昴宿庚寅以老的沙為御史大夫詔作新風紀九月丁酉朔詔授昔班帖木兒同知河東宣慰司事其妻刺八哈敦雲中郡夫人子觀音奴贈同知大同路事仍旌表其門閭先是昔班帖木兒為趙王位下同知怯怛口總管府事其妻嘗保育趙王及是部落滅里叛欲殺王昔班帖木兒與妻謀以其子觀音奴服王平日衣冠居王宮夜半夫妻衛趙王微服遁去比賊至遂殺觀音奴趙王得免事聞故旌其忠焉褒封唐贈諫議大夫劉蕡為文節昌平侯閔先生攻保定路

不克遂陷完州掠大同興和塞外諸郡中書左丞張
冲請立團練安撫勸農使司二道一奉元延安等處
一鞏昌等處從之壬寅詔命中書參知政事普顏不
花治書侍御史李國鳳經畧江南癸卯詔以福建行
中書省平章政事慶童爲江南行臺御史大夫丙午賊
兵攻大同路壬戌平定州陷乙丑陳友諒陷贛州路
江西行省參知政事金普庵撒里及總管哈海赤死
之冬十月丙寅朔詔豫主阿剌忒納失里徙居白海
尋遷六盤壬申

大明興永蘭溪州己卯太陰犯昴宿壬午監察御史

燕赤不花劾右丞相搠思監罪狀詔收其印綬乙酉
監察御史答兒麻失里王彛等復劾之請正其罪帝
不聽壬辰大同路陷達魯花赤完者帖木兒棄城遁
十一月乙未朔以普化帖木兒爲福建行省平章政
事癸卯陳友諒陷汀州路丙午太陰犯昴宿太白犯
房宿丁未田豐陷順德路先是樞密院判官劉起祖
守順德糧絕劫民財掠牛馬民強壯者令充軍弱者
殺而食之至是城陷起祖遂盡驅其民走于廣平辛
酉太陰掩心宿十二月乙丑朔日有食之癸酉閔先
生破頭潘等陷上都焚宮闕留七日轉畧往遼陽遂

至高麗戊寅太白經天庚辰察罕帖木兒遣樞密院判官瑣住進兵于遼陽癸未太白經天甲申

大明兵平婺州路達魯花赤僧住浙東廉訪使楊惠死之戊子太陰犯房宿

十九年春正月甲午朔陳友諒兵陷信州路守臣江東廉訪副使伯顏一不花的力戰死之

大明兵取諸暨州辛丑太陰犯昴宿乙巳以朶兒只班爲中書平章政事丙午遼陽行省陷懿州路總管

三震死之瞻震河南行省左丞追封東平郡公察罕

帖木兒遣樞密院判官陳秉直八不沙將兵二萬守

集寧癸丑流星如酒盃大有聲如雷三月辛巳樞密

副使朶兒只以賊犯順寧命張立將精銳由紫荆關

出討命鴉鷂由北口出迎敵甲申叛將梁炳攻辰州

守將和尚擊敗之以和尚爲湖廣行省參知政事賊

由飛狐靈丘犯蔚州庚寅御史臺臣言先是召募義

兵費用銀鈔一百四十萬錠多近侍權倖冒名關支

率爲虛數乞令軍士凡已領官錢者立限出征詔從

之已而復止不行是月詔孛羅帖木兒移兵鎮大同

以爲京師捍蔽置大都督兵農司仍置分司十道專

督屯種以孛羅帖木兒領之所在侵奪民田不勝其

擾太不范潰散之兵數萬鈔掠山西察罕帖木兒遣
陳秉直分兵駐榆次招撫之其首領悉送河南屯種
三月癸巳朔陳友諒遣兵由信州畧衢州復遣兵陷
襄陽路辛丑京城北兵馬司指揮周哈刺牙與林智
和等謀叛事覺伏誅庚戌太陰犯房宿壬戌詔定科
舉流寓人名額蒙古色日南人各十五名漢人二十
名夏四月癸亥朔汾水暴漲賊陷金復等州司徒知
樞密院事佛家奴調兵平之甲子毛貴為趙君用所
殺帝以天下多故卻天壽節朝賀詔群臣曰朕方今
宜敬天地法祖宗以自脩省朕初度之日群臣毋賀

庚午左丞相太平暨文武百官奏曰天壽節朝賀乃
臣子報本實合禮典今謙讓不受固陛下盛德然今
軍旅征進君臣名分正宜舉行不允壬申皇太子復
率群臣上奏曰朝賀祝壽是祖宗以來舊行典故今
不行有乖於禮帝曰今盜賊未息萬姓荼毒正朕恐
懼修省敬天之時柰何受賀以自樂乙亥御史大夫
帖里帖木兒復奏曰天壽朝賀之禮蓋出臣子之誠
伏望陛下曲徇所請若朝賀之後內庭燕集特賜除
免亦古者人君減膳之意仍乞宣示中書使內外知
聖天子憂勤惕厲至於如此帝曰為朕缺於修省以

致萬姓塗炭今復朝賀燕集是重朕之不德當俟天
下安寧行之未晚卿等其毋復言卒不聽己丑賊陷
寧夏路遂畧靈武等處五月壬辰朔以陝西行臺御
史大夫完者帖木兒爲陝西行省左丞相便宜行事
丙申熒惑犯鬼宿丁酉皇太子奏請巡北邊以撫綏
軍民御史臺臣上疏固留詔從之壬寅察罕帖木兒
請令歲八月鄉試河南舉人及避兵儒士不拘籍貫
依河南省元定額數就陝州置貢院應試詔從之丙
午太陰犯天江丁未太陰犯斗宿是月察罕帖木兒
大發秦晉諸軍討汴梁圍其城山東河東河南關中

等處蝗飛蔽天人馬不能行所落溝塹盡平民大饑

六月辛巳詔以宣徽使燕古兒爲御史大夫秋七月

壬辰朔出搠思監爲遼陽行省左丞相便宜行事丁

酉太白犯上將庚子詔以察罕腦兒宣慰司之地屬

資正院有司毋得差占察罕腦兒之地在世祖時隸

忙哥歹太子四千戶今從皇后竒氏請故以屬之資

正院甲辰太白犯右執法戊申命國王囊加歹中書

平章政事佛家奴也先不花知樞密院事黑驢等統

領探馬赤軍進征遼陽己酉太白犯左執法丙辰趙

君用既殺毛貴其黨續繼祖自遼陽入益都殺君用

遂與其所部自相讎敵是月霸州及介休靈石縣蝗
八月辛酉朔倪文俊餘黨陷歸州戊寅察罕帖木兒
督諸將閏思孝李克彛虎林赤賽因赤答忽脫因不
花呂文完哲賀宗哲孫翥等攻破汴梁城劉福通奉
其僞主遁退據安豐己卯蝗自河北飛渡汴梁食田
禾一空詔以察罕帖木兒為河南行省平章政事兼
同知河南行樞密院事陝西行臺御史中丞依前便
宜行事仍賜御衣七寶腰帶以旌其功是月大同路
蝗襄垣縣螟螣九月癸巳以中書平章政事帖里帖
木兒為陝西行省左丞相便宜行事乙巳以湖南北
江東西四道廉訪司所治之地皆陷詔任其所便之
地置司丙午夜白虹貫天丁未禁軍人不得私殺牛
馬甲寅太白犯天江是月

大明兵取衢州路詔遣兵部尚書伯顏帖木兒戶部
尚書曹履亨以御酒龍衣賜張士誠徵海運糧冬十
月庚申朔詔京師十一門皆築甕城造吊橋以方國
珍為江浙行省平章政事壬申太白犯斗宿辛巳流
星大如桃十一月癸卯

大明兵取慶州路戊申陳友諒兵陷杉關十二月戊
辰太白犯壘壁陣是月知樞密院事兀良哈台領太

不花軍其所部方脫脫與弟方伯帖木兒時保遼州兀良哈台同唐琰高脫因等屯孟州與察罕帖木兒部將八不沙等交兵已而兀良哈台獨引達達軍還京師方脫脫等乃從孛羅帖木兒皇太子憾太平忤已以中書左丞成遵參知政事趙中皆太平所用使監察御史誣成遵趙中以賊罪杖殺之是歲以後因上都宮闕盡廢大駕不復時巡陳友諒以江州爲都迎僞主徐壽輝居之自稱漢王

二十年春正月己丑朔察罕帖木兒請以鞏縣改立軍州萬戶府招民屯種從之御史大夫老的沙御史

中丞咬住奏令

後各處從宜行事官員毋得陰挾私

讎明爲舉索輒將風憲官吏擅自遷除侵擾行事沮壞臺綱從之己亥太陰犯井宿癸卯大寧路陷壬子以危素爲參知政事乙卯會試舉人知貢舉平章政事八都麻失里同知貢舉翰林學士承旨李好文禮部尚書許從宗考試官國子祭酒張翥同考官太常博士傅亨等奏舊例各處鄉試舉人三年一次取三百名會試取一百名今歲鄉試所取比前數少止有八十八名會試三分內取一分合取三十名如於三十名外添取五名爲宜從之丙辰五色雲見移時二

月戊午朔左丞相太平罷為太保守上都三月戊子朔田豐陷保定路彗星見東方甲午廷試進士三十人賜買住魏元禮進士及第其餘出身有差乙巳興寧路陷壬子以朔思監為中書右丞相夏四月庚申命大司農司都事樂元臣招諭田豐至其軍為豐所害丁卯太陰犯明堂辛未僉行樞密院事張居敬復興中州癸酉太陰犯東咸五丁亥朔日有食之雨雹陳友諒殺其偽主徐壽輝於太平路遂稱皇帝國號大漢改元大義已而回駐於江州乙未陳友諒遣羅忠顯陷辰州己亥以絆住馬為中書平章政事壬寅太陰犯

星是月張士誠海運糧十一萬石至京師閏月己未以太尉也帖木兒知經筵事以甘肅行省左丞相阿吉刺為太尉乙亥流星大如桃六月己丑命孛羅帖木兒部將方脫脫守禦嵐興保德州等處詔今後察罕帖木兒與孛羅帖木兒部將毋得互相越境侵犯所守信地因而讐殺方脫脫不得出嵐興州境界察罕帖木兒亦不得侵其地癸巳太白犯井宿戊戌太陰犯建星是月

大明兵取信州路秋七月辛酉命遼陽行省參知政事張居敬討義州賊孛羅帖木兒敗賊王士誠於臺

州乙丑太陰犯井宿乙亥詔李羅帖木兒總領達達漢兒軍馬為總兵官仍便宜行事八月戊子命李羅帖木兒守石嶺關以北察罕帖木兒守石嶺關以南辛卯太陰犯天江壬辰加封福建鎮閩王為護國英仁武烈忠正福德鎮閩尊王乙未永平路陷壬辰填星犯太微甲辰太陰犯井宿詔諸處所在權攝官員專務漁獵百姓今後非朝廷允許不得之任庚戌詔江浙行省左丞相達識帖睦迺加太尉兼知江浙行樞密院事提調行宣政院事便宜行事九月乙卯朔詔遣參知政事也先不花往諭李羅帖木兒察罕帖

木兒令講和時李羅帖木兒調兵自石嶺關直抵美寧圍其城三日復退屯交城察罕帖木兒調參政閻奉先引兵與戰已而各於石嶺關南北守禦壬戌賊陷孟州又陷趙州攻真定路癸未賊復犯上都右丞忙哥帖木兒引兵擊之敗績冬十月甲申朔甘露降于國子監大成殿前柏木以張良弼為湖廣行省參知政事討南陽襄樊詔李羅帖木兒守美寧李羅帖木兒遣保保殷與祖高脫因倍道趨美寧守者不納丙戌命迭兒必失為太尉守衛大幹耳朶思戊子焚惑犯井宿己亥察罕帖木兒遣陳秉直瑣住等以兵

攻孛羅帖木兒之軍于異寧與孛羅帖木兒部將脫
列伯戰敗之時帝有旨以異寧畀孛羅帖木兒察罕
帖木兒以爲用兵數年惟藉異晉以給其軍而致盛
強苟奉旨與之則彼得以足其兵食乃託言用師汴
梁尋渡河就屯澤潞拒之調延安軍交戰於東勝州
等處再遣八不沙以兵援之八不沙謂彼軍奉旨而
來我何敢抗王命察罕帖木兒怒殺之十一月甲寅
朔黃河清凡三日孛羅帖木兒以兵侵汾州察罕帖
木兒以兵拒之癸酉賊犯易州十二月丙戌詔太廟
影堂祭祀乃子孫報本重事近兵興歲獻品物不能
豐備累朝四祭減爲春秋二祭今宜復四祭後竟不
行辛卯廣平路陷是歲陽翟王阿魯輝帖木兒擁兵
數十萬屯于木兒古徹兀之地將犯京畿使來言曰
祖宗以天下付汝汝已失其大半若以國璽付我我
當自爲之帝遣報之曰天命有在汝欲爲則爲之命
樞密院事秃堅帖木兒等將兵擊之不克軍士皆潰
秃堅帖木兒走上都

紀卷第四十五

紀卷第四十六

元史四十六

翰林學士帶大夫知制誥兼修國史臣宗濂翰林待制承旨同知制誥兼國史院編修官宗濂等奉
勅

順帝九

二十一年春正月癸丑朔詔赦天下命中書參知政
事七十往諭孛羅帖木兒罷兵還鎮復遣使往諭察
罕帖木兒亦令罷兵孛羅帖木兒縱兵掠冀寧等處
察罕帖木兒以兵拒之故有是命庚申太陰犯歲星
乙丑河南賊犯杞縣察罕帖木兒討平之丁卯李思
齊進兵平伏羗縣等處癸酉石州大風拔木六畜俱

鳴民所持槍忽生火焰抹之即無搖之即有二月癸未朔填星退犯大微垣甲申同僉樞密院事迭里帖木兒復永平灤州等處己丑察罕帖木兒駐兵霍州攻孛羅帖木兒壬寅太陰犯天江是月江南行臺侍御史八撒刺不花殺廣東廉訪使完者篤副使李思誠僉事迭麥赤以兵自衛據廣州時八撒刺不花以廉訪使久居廣東專恣自用詔乃以完者篤等為廉訪司官而除八撒刺不花侍御史八撒刺不花不受命怒完者篤等代己即誣以罪盡殺之惟廉訪使董鑄哀請得免三月丙辰太陰犯井宿癸酉察罕帖木兒調兵討永城縣又駐兵宿州擒賊將梁綿住庚辰勞感犯鬼宿是月張士誠海運糧一十一萬石至京師孛羅帖木兒罷兵還遣脫列伯等引兵據延安以謀入陝張良弼出南山義谷駐藍田受節制於察罕帖木兒良弼又陰結陝西行省平章政事定住聽丞相帖里帖木兒調遣營于鹿臺夏四月辛巳朔日有食之是月以張良弼為陝西行省叅知政事察罕帖木兒遣其子副詹事擴廓帖木兒貢糧至京師皇太子親與定約遂不復疑五月癸丑四川明玉珍陷嘉定等路李思齊遣兵擊敗之壬戌太陰犯房宿癸酉太

白犯軒轅甲戌熒惑犯太白乙亥察罕帖木兒以兵
侵孛羅帖木兒所守之地是月李思齊受李武崔德
等降六月乙未熒惑歲星太白聚于翼宿丙申察罕
帖木兒總兵討山東發晉軍下井陘出邯鄲過磁相
懷衛踰白馬津發其軍之在汴梁者繼之水陸並進
戊戌太陰犯雲雨甲辰太白晝見秋七月辛亥察罕
帖木兒平東昌己巳忻州西北有赤氣蔽天如血是
月察罕帖木兒進兵復冠州八月乙酉大同路北方
夜有赤氣蔽天移時方散庚子以福建行省平章政
事普化帖木兒爲江南行臺御史大夫癸卯

大明兵取江州路時僞漢陳友諒據江州爲都至是
退都武昌是月察罕帖木兒遣其子擴廓帖木兒闊
思孝等會關保虎林赤等將兵由東河造浮橋以濟
賊以二萬餘衆奪之關保虎林赤且戰且渡拔長清
討東平東平僞丞相田豐遣崔世英等出戰大破之
乃遣使招諭田豐豐降東平平令豐爲前鋒從大軍
東討棣州俞寶降東平王士誠東昌楊誠等皆降魯
地悉定進兵濟南劉珪降遂圍益都九月戊午陽翟
王阿魯輝帖木兒伏誅阿魯輝帖木兒以宗親見天
下盜賊並起遂乘間隙肆爲異圖詔必保知樞密院

事老章率諸軍討之老章遂敗其衆尋爲部將同知太常禮儀院事脫驪所擒送闕下詔誅之於是詔加老章太傅和寧王以阿魯輝帖木兒之弟忽都帖木兒襲封陽翟王宗王囊加玉樞虎兒吐華與脫驪悉議加封壬戌四川賊兵陷東川郡縣李思齊調兵擊之壬申命李羅帖木兒於保定以東河間以南從便屯種是月命兵部尚書徹徹不花侍郎韓祺徵海運糧于張士誠

大明取建昌饒州二路冬十月癸巳絳州有赤氣見北方如火以察罕帖木兒爲中書平章政事兼知河南山東等處行樞密院事陝西行御史臺中丞察罕帖木兒調叅知政事陳秉直劉珪等守禦河南十一月戊申朔温州樂清縣雷庚戌太陰犯建星癸亥太陰犯井宿戊辰黃河自平陸三門磧下至孟津五百餘里皆清凡七日命秘書少監程徐祀之壬申太陰犯氐宿是月察罕帖木兒李思齊遣兵圍鹿臺攻張良弼詔和解之俾各還信地兵乃解是歲京師大饑屯田成收糧四十萬石賜司農丞胡秉彝尚尊金幣以旌其功

二十二年春正月戊申朔太白犯建星甲寅詔李思

齊計四川張良弼平襄漢時兩軍不和故有是命乙卯填星退犯左執法庚申

大明取江西龍興諸路時江西諸路皆陳友諒所據丁卯詔以太尉完者帖木兒爲陝西行省左丞相仍命察罕帖木兒屯種于陝西申諭李思齊張良弼等各以兵自効以也先不花爲中書右丞二月丁丑朔盜殺陝西行省右丞塔不歹己卯太白犯壘壁陣乙酉彗星見于危宿光芒長丈餘色青白丁酉彗星犯離宮西星至二月終光芒長二丈餘是月知樞密院事禿堅帖木兒奉詔諭李思齊討四川時思齊退保

鳳翔使至思齊進兵益門鎮使還思齊復歸鳳翔三月戊申彗星不見星形惟有白氣形曲竟天西指掃大角壬子彗星行過太陽前惟有星形無芒在昴宿至戊午始滅甲寅四川明玉珙陷雲南省治屯金馬山陝西行省叅知政事車力帖木兒等擊敗之擒明玉珙弟明二己未御史大夫老的沙辭職不許是月命孛羅帖木兒爲中書平章政事位第一加大尉張良弼受節制於孛羅帖木兒李思齊遣兵攻良弼至于武功良弼以伏兵大破之夏四月丙子朔長星見其形如練長數十丈在虛危之間後四十餘日乃滅丁

亥熒惑離太陽三十九度不見當出不出己丑詔諸
王駙馬御史臺各衙門不許占匿人民不當差役乙
未賊新橋張陷安州李羅帖木兒來請援兵是月紹
興路大疫五月乙巳朔泉州賽甫丁據福州路福建
行省平章政事燕只不花擊敗之餘衆航海還據泉
州福建行省叅知政事陳有定復汀州路己未中書
叅知政事陳祖仁上章乞罷修上都宮闕辛酉太陰
犯建星辛未明玉珎據成都自稱隴蜀王遣僞將楊
尚書守重慶分兵寇龍州青州犯興元鞏昌等路是
月張士誠海運糧二十三萬石至京師六月辛巳彗

星見紫微垣光芒長尺餘東南指西南行戊子彗星
光芒掃上宰田豐及王士誠刺殺察罕帖木兒遂走
入益都城衆乃推察罕帖木兒之子擴廓帖木兒爲
總兵官復圍益都詔贈察罕帖木兒推誠定遠宣忠
亮節功臣開府儀同三司上柱國河南行省左丞相
追封忠襄王謚獻武食邑沈丘縣令河南山東等處
立廟長吏歲時致祭其父司徒阿都溫賜良田二百
頃其子擴廓帖木兒授光祿大夫中書平章政事兼
知河南山東等處行樞密院事同知詹事院事一應
軍馬並聽節制仍詔諭其將士曰凡爾將佐久爲察

罕帖木兒從事惟恩與義寔同骨肉視彼逆黨不共
戴天當力圖報復以伸大義己亥益都賊兵出戰擴
廓帖木兒生擒六百餘人斬首八百餘級秋七月乙
卯彗星滅跡丙辰熒惑見西方須臾成白氣如長蛇
光炯有文橫亘中天移時乃滅是月河決范陽縣漂
民居八月己亥擴廓帖木兒言孛羅帖木兒張良弼
據延安掠黃河上下欲東渡以奪晉寧乞賜詔諭癸
巳太白犯畢宿九月癸卯朔劉福通以兵援田豐至
火星墀擴廓帖木兒遣關保邀擊大破之甲辰以山
北廉訪司權置于惠州丁未太白犯亢宿己酉太陰

犯斗宿癸亥歲星犯軒轅丙寅熒惑犯鬼宿戊辰以
也速為遼陽行省左丞相依前總兵撫安迤東郡縣
己巳有流星如酒盃色青白光明燭地熒惑犯鬼宿
積屍氣冬十月壬申朔江西行省平章朶列不花移
檄討八撒刺不花時朶列不花分省廣州適邵宗愚
陷廣州執八撒刺不花殺之甲戌孛羅帖木兒南侵
擴廓帖木兒所守之地遂移真定路己卯太陰犯牛
宿丁亥辰星犯亢宿戊子太陰犯畢宿十一月乙巳
擴廓帖木兒復益都田豐等伏誅自擴廓帖木兒既
襲父職身率將士誓必復歸人心亦思自奮圍城益

急賊悉力拒守乃以壯士完地通道而入遂克之盡
誅其黨取田豐王士誠之心以祭察罕帖木兒庚戌
擴廓帖木兒遣關保復莒州山東悉平庚申詔授擴
廓帖木兒太尉銀青榮祿大夫中書平章政事知樞
密院事太子詹事便宜行事襲總其父兵將校士卒
論賞有差察罕帖木兒父阿魯溫進封汝陽王察罕
帖木兒改贈宣忠興運弘仁効節功臣進封潁川王
改謚忠襄癸亥四川賊兵陷清州十二月壬辰太陰
犯角宿庚子以中書平章政事佛家奴為御史大夫
是歲樞密副使李士瞻上疏極言時政凡二十條一

曰以博己過以詔天下二曰罷罷作以快人心一曰御

經理以講聖學四曰延老成以詢治道五曰去姑息

以振乾剛六曰開言路以求得失七曰明賞罰以厲

百司八曰公選舉以息奔競九曰察近倖以杜奸弊

十曰嚴宿衛以備非常十一曰省佛事以節浮費十

二曰絕濫賞以足國用十三曰罷各官屯種俾有司

經理十四曰減常歲計置為諸官用度十五曰招集

散亡以實八衛之兵十六曰廣給牛具以備屯田之

用十七曰獎勵守令以勸農務本十八曰開誠布公

以禮待藩鎮十九曰分遣大將急保山東二十曰依

唐廣寧故事分道進取先是薊國公脫火赤上言乞
罷三宮造作帝爲城軍匠之半還隸宿衛而造作如
故故士瞻䟽首及之皇太子嘗坐清寧殿分布長席
列坐西番高麗諸僧皇太子曰李好文先生教我儒
書多年尚不省其義今聽佛法一夜即能曉焉於是
頗崇尚佛學帝以讒廢高麗王伯顏帖木兒立塔思
帖木兒爲王國人上書言舊王不當廢新王不當立
之故初皇后竒氏宗族在高麗恃寵驕橫伯顏帖木
兒屢戒勛不悛高麗王遂盡殺竒氏族皇后謂太子
曰爾年已長何不爲我報讎時高麗王昆弟有自京

師者乃議立塔思帖木兒爲王而以竒族子三寶奴
爲元子以將作同知崔帖木兒爲丞相以兵萬人送
之國至鴨綠江爲高麗兵所敗僅餘十七騎還京師
詔加封唐撫州刺史南庭王危全諷爲南庭忠烈靈
惠王

二十三年春正月壬寅朔四川明玉珰僭稱皇帝建
國號曰大夏紀元曰天統乙巳大寧陷庚戌歲星犯
軒轅二月戊戌太白晝見庚子亦如之是月擴廓帖
木兒自益都領兵還河南留鎖住以兵守益都以山東州
縣立屯田萬戶府三月辛丑朔彗星見東方經月乃

滅詔中書平章政事愛不花分省冀寧擴廓帖木兒
遣兵據之丙午大赦天下丁未親試進士六十二人
賜寶寶楊輓進士及第餘出身有差丙辰太白犯氏
宿壬戌大同路夜有赤氣亘天中侵北斗是月立廣
西行中書省以廉訪使也兒吉尼爲平章政事時南
方邵縣多陷沒惟也兒吉尼獨保廣西者十五年立
膠東行中書省及行樞密院總制東方事以袁宏爲
叅知政事是春關先生餘黨復自高麗還寇上都孛
羅帖木兒擊降之夏四月辛丑熒惑犯歲星孛羅帖
木兒李思齊互相交兵庚申歲星犯軒轅是月擴廓

帖木兒遣貊高等以兵擊張良弼五月己巳朔張士
誠海運糧十三萬石至京師壬午太白晝見甲午亦
如之乙未熒惑犯右執法是月爪哇遣使淡濛加加
殿進金表貢方物六月戊戌朔孛羅帖木兒遣方脫
脫迎匡福於彰德擴廓帖木兒遣兵追之敗還匡福
遂據保定路己亥擴廓帖木兒部將歹驢等駐兵藍
田七盤李思齊攻圍興平遂據整屋孛羅帖木兒時
奉詔進討襄漢而歹驢阻道於前思齊踵襲於後乃
請催督擴廓帖木兒東出潼關道路既通即便南討
戊申孛羅帖木兒遣竹貞等入陝西據其省治時陝

西行省右丞谷失鐵木兒與行臺有隙且恐陝西為
擴廓帖木兒所據陰結於孛羅帖木兒請竹貞入城
劫御史大夫完者帖木兒及監察御史張可遵等印
其後屢使召完者帖木兒貞拘留不遣擴廓帖木兒
遣部將貊高與李思齊合兵攻之竹貞出降遂從擴
廓帖木兒庚戌星隕于濟南龍山入地五尺甲寅詔
授江南下第及後期舉人為路府州儒學教授乙卯
太白犯井宿丁巳絳州有白虹二道衝斗牛間庚申
平陽路有白氣二道一貫北極一貫北斗一貫天漢
至夜分乃滅壬戌太白晝見夜犯井宿秋七月戊辰

朔京師大雹傷禾稼丁丑以馬良為中書參知政事
乙酉太白晝見有星墜于慶元路西北聲如雷光芒
數十丈久之乃滅八月丁酉朔倭人寇蓬州守將劉
暹擊敗之自十八年以來倭人連寇瀕海郡縣至是
海隅遂安辛丑擴廓帖木兒遣兵侵孛羅帖木兒所
守之境壬寅太白犯軒轅乙巳太陰犯建星丁未太
白犯軒轅己酉太白晝見丙辰太陰犯畢宿沂州有
赤氣亘天中有白色如蛇形徐徐西行至夜分乃滅
戊午孛羅帖木兒言擴廓帖木兒踵襲父惡有不臣
之罪乞賜處置己未太白晝見辛酉太白犯歲星乙

丑太白犯右執法是月

大明兵與僞漢兵大戰于鄱陽湖陳友諒敗績而死其子理自立仍據武昌為都改元德壽

大明兵遂進圍武昌九月丁卯朔遣爪哇使淡濛加殿還國詔賜其國主三珠金虎符及織金紋幣辛未太白犯左執法乙亥歲星犯右執法丁丑辰星犯填星丁亥太白犯填星辰星犯亢宿是月張士誠自稱吳王來請命不報遣戶部侍郎博羅帖木兒等徵海運于張士誠士誠不與冬十月丙申朔青齊一方赤氣千里癸卯太白犯氐宿甲辰湖廣僞姚平章張

知院陰遣人言於擴廓帖木兒設計擒殺僞漢主陳

理及僞夏主明玉珍不果巳酉監察御史米只兒海

牙劾奏太博太平罪狀詔安置太平于陝西之西仍

拘收宣命并御賜等物戊午太白犯房宿是月擴廓

帖木兒遣僉樞密院事任亮復安陸府李羅帖木兒

遣兵攻真寧至石嶺關擴廓帖木兒大破走之擒其

將烏馬兒殷興祖李羅帖木兒軍由是不振十一月

壬甲御史臺臣言故右丞相脫脫有大臣之體向在

中書政務修舉深懼滿盈自求引退加封鄭王固辭

不受再秉鈞軸克濟艱危統軍進征平徐州收六合

大功垂成浮言搆難奉詔謝兵就貶以沒已蒙錄用
其子還所籍田宅更乞憫其勲舊還其所授宣命從
之癸未太陰犯軒轅歲星犯左執法是歲御史大夫
老的沙與知樞密院事禿堅帖木兒得罪於皇太子
皆奔大同孛羅帖木兒匿之營中

二十四年春正月戊寅太白犯軒轅庚辰保德州民
家產豬一頭兩身二月壬子歲星犯左執法癸丑太
陰犯西咸池是月

大明滅僞漢其所據湖南北江西諸郡皆降于

大明三月乙亥監察御史王朶列禿崔卜顏帖木兒

等諫皇太子勿親征辛卯詔以孛羅帖木兒匿老的

沙謀為悖逆解其兵權削其官爵候道路開通許還

四川田里孛羅帖木兒拒命不受夏四月甲午朔命

擴廓帖木兒討孛羅帖木兒乙未太陰犯西咸池孛

羅帖木兒悉知詔令調遣之事非出帝意皆右丞相

搠思監所為遂令禿堅帖木兒舉兵向闕壬寅禿堅

帖木兒兵入居庸關癸卯知樞密院事也速詹事不

蘭奚迎戰于皇后店不蘭奚力戰也速不援而退不

蘭奚幾為所獲脫身東走甲辰皇太子率侍衛兵出

光熙門東走古北口趨興松乙巳禿堅帖木兒兵至

清河列營時都城無備城中大震令百官吏卒分守
京城使達達國師至其軍問故以必得搠思監及宦
官朴不花爲對詔慰解之不聽丁未詔屏搠思監于
嶺北竄朴不花于甘肅執而與之復孛羅帖木兒前
官仍總兵以也速爲左丞相庚戌秃堅帖木兒陳兵
自健德門入覲帝于延春閣慟哭請罪帝就宴賚之
加孛羅帖木兒太保依前守禦大同秃堅帖木兒爲
中書平章政事辛亥秃堅帖木兒軍還皇太子至路
兒嶺詔追及之還宮癸丑太白犯井宿甲子黃河清
戊辰擴廓帖木兒奉命討孛羅帖木兒屯兵冀寧其

東道以白鎖住領兵三萬守禦京師中道以豹高竹
貞領兵四萬西道以關保領軍五萬合擊之關保等
兵逼大同孛羅帖木兒留兵守大同而自率兵與秃
堅帖木兒老的沙復大舉向關甲戌太白犯鬼宿乙
亥又犯積屍氣歲星犯左執法六月癸卯三星晝見
白氣橫突其中甲辰河南府有大星夜見南方光如
晝丁未大星隕照夜如晝及旦黑氣晦暗如夜甲寅
白鎖住以兵至京師請皇太子西行丁巳太白犯右
執法是月保德州黃龍見井中秋七月癸亥太白與
歲星合于翼宿甲子歲星犯左執法丙戌孛羅帖木

兒前鋒軍入居庸關皇太子親率軍禦于清河也速
軍于昌平軍士皆無鬪志皇太子馳還都城白鎖住
引兵入平則門丁亥白鎖住扈從皇太子出順承門
由雄霸河間取道往真寧戊子孛羅帖木兒駐兵健
德門外與禿堅帖木兒老的沙入見帝于宣文閣訴
其非罪皆泣帝亦泣乃賜宴孛羅帖木兒欲追襲皇
太子老的沙止之庚寅詔以孛羅帖木兒爲中書左
丞相老的沙爲中書平章政事禿堅帖木兒爲御史
大夫其部屬布列省臺百司以也速知樞密院事詔
諭孛羅帖木兒擴廓帖木兒俱朕股肱視同心膂自

今各棄宿忿弼成大勲是月

大明兵取廬州路八月壬辰朔日有食之乙未熒惑
犯鬼宿壬寅詔以孛羅帖木兒爲中書右丞相監修
國史節制天下軍馬乙巳皇太子至真寧乙卯張士
誠自以其弟士信代達識帖睦爾爲江浙行省左丞
相是月孛羅帖木兒請誅狎臣禿魯帖木兒波迪哇
兒禡罷三宮不急造作沙汰宦官減省錢糧禁止西
番僧人好事九月辛酉朔宦官思龍宜潛送宮女伯
忽都出自順承門以達于皇太子乙丑太白晝見癸
酉夜天西北有紅光至東而散甲申太陰犯軒轅是

月

大明兵取中興及歸峽潭衡等路冬十月丙午太陰犯畢宿己酉太陰犯井宿己未詔皇太子還京師命也速老的沙分道總兵十二月乙卯太陰犯太白二十五年春正月癸亥封李思齊爲許國公丙寅太白晝見戊辰亦如之己巳

大明兵取寶慶路守將唐隆道遁走僞漢守將熊天瑞以贛州及韶州南雄降于

大明甲戌太白犯建星壬午監察御史李羅帖木兒賈彬等辯明谷麻雪雪之罪二月辛丑汴梁路見日

傍有一月一星丙午太陰犯填星戊午皇太子在冀寧命甘肅行省平章政事朵兒只班以岐王阿剌乞兒軍馬會平章政事臧卜李思齊各以兵守寧夏三月庚申皇太子下令于擴廓帖木兒軍中曰李羅帖木兒襲據京師余既受命總督天下諸軍恭行顯罰少保中書平章政事擴廓帖木兒躬勒將士分道進兵諸王駙馬及陝西平章政事李思齊等各統軍馬尚其奮義戮力尅期恢復丙寅李羅帖木兒幽置皇后竒氏于諸色總管府丁卯命老的沙別帖木兒並爲御史大夫戊辰太白犯壘壁陣夏四月庚寅李羅

帖木兒至諸色總管府見皇后奇氏令還宮取印章
作書遺皇太子遣內侍官完者秃持往與寧復出皇
后幽之乙巳關係等兵進圍大同壬子熒惑犯靈臺
乙卯關保入大同五月辛酉熒惑犯太微垣甲子京
師天雨輦長尺許或言於帝曰龍絲也命拾而祀之
乙亥

大明兵破安陸府守將任亮迎戰被執己卯

大明兵破襄陽路是月侯卜延谷失奉威順王自雲
南經蜀轉戰而出至成州欲之京師李思齊俾屯田
于成州六月戊子以黎安道爲中書參知政事辛丑

湖廣行省左丞周文貴復寶慶路乙巳皇后奇氏自

幽所還宮乙卯以太尉火你赤爲御史大夫是月皇

太子加李思齊銀青榮祿大夫邠國公中書平章政

事皇太子詹事兼四川行樞密院事虎符招討使分

中書四部秋七月丁丑填星歲星熒惑聚于角亢太

陰犯畢宿己卯太陰犯畢宿乙酉孛羅帖木兒伏誅

秃堅帖木兒老的沙皆遁走丙戌遣使函孛羅帖木

兒首往與寧召皇太子還京師大赦天下黎安道方

脫脫雷一聲皆伏誅是月京師大水河決小流口達

于清河八月丁亥朔京城門至是不開者三日竹貞

豹高軍至城外命軍士緣城而上碎平則門鍵悉以
軍入占民居奪民財乙未太陰犯建星己亥太白犯
壘壁陣癸卯詔命皇太子分調將帥戡定未復郡邑
即還京師行事之際承制用人並准正授丁未皇后
弘吉刺氏崩壬子以洪寶寶帖古思不花捏烈秃並
為中書平章政事九月擴廓帖木兒扈從皇太子至
京師丁丑太陰犯井宿壬午詔以伯撒里為太師中
書右丞相監修國史擴廓帖木兒為太尉中書左丞
相錄軍國重事同監修國史知樞密院事兼太子詹
事是月以方國瑛為淮南行省左丞相分省慶元冬

十月辛卯熒惑犯天江壬寅以哈刺章為知樞密院
事丁未益王渾都帖木兒樞密副使觀音奴擒老的
沙誅之秃堅帖木兒以餘兵徃八兒思之地命嶺北
行省左丞相山僧及知樞密院事魏賽因不花同討
之戊申以資政院使秃魯為御史大夫己酉熒惑犯
斗宿太陰犯右執法庚戌太陰犯太微垣閏月庚申
以賓國公五十八為知樞密院事詔張良弼俞寶孔
興等悉聽調於擴廓帖木兒戊辰太白辰星熒惑聚
于斗宿太陰犯畢宿辛未詔封擴廓帖木兒河南王
代皇太子親征總制關陝晉冀山東等處并迤南一

應軍馬諸王各愛馬應該總兵統兵領兵等官凡軍民一切機務錢糧名爵黜陟予奪悉聽便宜行事壬申太白犯辰星辛巳以脫脫木兒為中書右丞達識帖木兒為叅知政事己丑太白犯熒惑太陰犯壘壁陣丙申太陰犯畢宿癸卯太陰犯太微垣是月大明兵取秦州時秦州通州高郵淮安徐州宿州泗州濠州安豐諸郡皆張士誠所據十二月乙卯詔立次皇后竒氏為皇后改竒氏為肅良合氏詔天下仍封竒氏父以上三世皆為王爵癸亥太陰犯畢宿以帖林沙為中書叅知政事庚子歲星掩房宿辛未太陰犯右執法是月禿堅帖木兒伏誅

紀卷第四十六

紀卷第四十七

元史四十七

翰林學士並中大夫知制誥無修國史臣宋濂翰林待制丞詹知制誥無國史院編修官王禕等奉

勅修

順帝十

二十六年春正月己酉以崇政院使孛羅沙為御史大夫壬子以完者木知樞密院事是月以沙藍荅里為中書左丞相命燕南河南山東陝西河東等處舉人會試者增其額數進士及第以下遞升官一級二月癸丑朔立河淮水軍元帥府於孟津縣甲戌詔天下以比者逆臣孛羅帖木兒秃堅帖木兒老的沙等

于紀亂倫內外之民經值軍馬致使困乏與免一切
雜泛差徭是月擴廓帖木兒還河南分立省部以自
隨尋居懷慶又居彰德調度各處軍馬陝西張良弼
拒命三月癸未朔罷洛陽嵩縣宣慰司丁亥白虹五
道亘天其第三道貫日又有氣橫貫東南良久始滅
甲午擴廓帖木兒遣關保虎林赤以兵西攻張良弼
于鹿臺李思齊脫烈伯孔興等兵皆與良弼合以蠻
子脫脫木兒知樞密院事乙未廷試進士七十二人
賜赫德溥化張棟進士及第餘出身有差監察御史
王倫普建言八事一曰用賢二曰申嚴宿衛三曰保

全臣子四曰八衛屯田五曰禁止奏請六曰培養人

才七曰罪人不孥八曰重惜名爵帝嘉納之是月

大明兵取高郵府夏四月辛酉詔立皇太子妃瓦只
刺孫答里氏是月

大明兵取淮安路徐州宿州濠州泗州潁州安豐路

五月壬午朔洛陽瑞麥生一莖四穗甲辰以脫脫不

花為御史大夫六月壬子朔汾州介休縣地震平遙

縣大雨雹紹興路山陰縣卧龍山裂己未命知樞密

院事買閭以兵守直沽命河間鹽運使拜住曹履亨

撫諭沿海竈戶俾出丁夫從買閭征討丙寅詔英宗

時謀為不軌之臣其子孫或成丁者可安置舊地幼者隨母居草地終身不得入京城及不得授官止許於本愛馬應役皇后肅良合氏生日百官進箋皇后諭沙藍答里等曰自世祖以來正宮皇后壽日不曾進箋近年雖行不合典故却之秋七月辛巳朔日有食之徐溝縣地震介休縣大水石州大星如斗自西南而落甲申以李思齊為太尉甲午太白經天丙申擴廓帖木兒遣朱珮盧旺屯兵河中遣關保虎林赤合兵渡河會竹貞商暲且約李思齊以攻張良弼良弼遣子弟質于思齊與良弼拒守保等不利思齊

請詔和解之丙午太白經天八月戊寅以李國鳳為中書左丞陳有定為福建行省平章政事九月甲申李思齊兵下鹽井獲川賊余繼隆誅之禮部侍郎滿尚賓吏部侍郎掩篤刺哈自鳳翔還京師先是尚賓等持詔諭思齊開通川蜀道路思齊方兵爭不奉詔尚賓等留鳳翔一年至是始還丙戌以方國珣為江浙行省左丞相弟國瑛國珉姪明善並為江浙行省平章政事己亥以中書平章政事失列門為御史大夫辛丑孛星見東北方冬十月甲子擴廓帖木兒遣其弟脫因帖木兒及豹高完哲等駐兵濟南以控制

山東十一月甲申

大明兵取湖州路丙申

大明兵取杭州路及紹興路辛丑

大明兵取嘉興路時湖州杭州紹興嘉興松江平江諸路及無錫州皆張士誠所據十二月庚午蒲城洛水和順崖崩

二十七年春正月乙未絳州夜聞天鼓鳴將旦復鳴其聲如空中戰鬪者庚子

大明兵取松江府癸卯

大明兵取沅州路是月李思齊張良弼脫列伯自會

于含元殿基推李思齊為盟主同拒擴廓帖木兒二

月庚申以買住為雲國公七十為中書平章政事月

魯不花為御史大夫乙丑以詹事月魯帖木兒為御

史大夫三月丁丑朔萊州大風有大鳥至其翅如席

擴廓帖木兒遣兵屯滕州以禦王信庚子京師大風

自西北起飛砂揚礫白日昏暗夏五月丙子朔白氣

二道亘天以去歲水潦霜災嚴酒禁戊寅以空名宣

勅遣付福建行省命平章政事曲出陳有定同驗有

功者給之辛巳大同隕霜殺麥癸未福建行宣政院

以廢寺錢糧由海道送京師乙酉以完者帖木兒為

中書右丞相辭以老病不許辛卯以知樞密院事失
列明為嶺北行省左丞相提調分通政院己亥以俺
普為中書平章政事辛丑擴廓帖木兒定擬其所屬
官員二千六百一十人從之是月山東地震雨白雹
李思齊遣張良弼部將郭謙等守黃連寨擴廓帖木
兒部將關保虎林赤商嵩竹貞引兵拔其寨郭謙走
會豹高等為變關保虎林赤夜遁李思齊遂解而西
六月丙午朔日有食之晝晦丁巳皇太子寢殿後新
甃井中有龍出光燄爍人宮人震懾仆地又長慶寺
有龍纏繞槐樹飛去樹皮皆剝丁卯沂州山崩是月
知樞密院事壽安奉空名宣勅與侯伯顏達世令其
以兵援擴廓帖木兒時李思齊據長安與商嵩拒戰
侯伯顏達世進兵攻李思齊秦州守將蕭公達降思
齊思齊知關保等兵退遣蔡琳等破其營侯伯顏達
世奔潰秋七月甲申命也速提調武備寺丁酉絳州
星隕光耀如晝是月李思齊遣許國佐薛穆飛會張
良弼脫列伯兵屯于華陰時命禿魯為陝西行省左
丞相思齊不悅遣其部將鄭應祥守陝西而自還鳳
翔龍見於臨朐龍山大石起立八月丙午詔命皇太
子總天下兵馬其略曰元良重任職在撫軍稽古徵

今卓有成憲曩者障塞決河本以拯民昏墊豈期妖盜橫造訛言簧鼓愚頑塗炭郡邑殆遍海內茲逾一紀故察罕帖木兒仗義興師獻功敵愾汛掃汴洛克平青齊爲國捐軀深可哀悼其子擴廓帖木兒克繼先志用成駿功愛猷識理達臘計安宗社累請出師朕以國本至重詎宜輕出遂授擴廓帖木兒總戎重寄畀以王爵俾代其行李思齊張良弼等各懷異見搆兵不已以致盜賊愈熾深遺朕憂况全齊密邇輦轂儻失早計恐生異圖詢諸衆謀僉謂皇太子聰明二孝文武兼資聿遵舊典爰命以中書令樞密使采

總天下兵馬諸王駙馬各道總兵將吏一應軍機政務生殺予奪事無輕重如出朕裁其擴廓帖木兒總領本部軍馬自潼關以東肅清江淮李思齊總統本部軍馬自鳳翔以西與侯伯顏達世進取川蜀以少保禿魯爲陝西行中書省左丞相本省駐札總本部及張良弼孔興脫列伯各枝軍馬進取襄樊王信本部軍馬固守信地別聽調遣詔書到日汝等悉宜洗心滌慮同濟時艱庚戌貊高殺衛輝守禦官余仁輔彰德守禦官范國英引軍至清化聞懷慶有備遂還彰德上疏言人臣以尊君爲本以盡忠爲心以愛民

爲務今總兵官擴廓帖木兒歲與官軍讎殺臣等乃
朝廷培養之人素知忠義焉能俛首聽命乞降明詔
別選重臣以總大兵詔以擴廓帖木兒不遵君命宜
黜其兵權就命豹高討之辛亥帖木兒不花進封淮
王賜金印設王傅等官壬子爲皇太子立大撫軍院
秩從一品知院四員同知二員副使同僉各一員經
歷都事各二員管勾一員癸丑封太師伯撒里永平
王甲寅以右丞相完者帖木兒翰林承旨答爾麻平
章政事完者帖木兒並知大撫軍院事丙辰完者帖
木兒言大撫軍院專掌軍機今後迤北軍務仍舊制

樞密院管其餘內外諸王駙馬各處總兵統兵行省
行院宣慰司一應軍情不許隔越惟大撫軍院
詹事院同知李國鳳同知大撫軍院事政完者帖
木兒爲副使左司員外郎咬住樞密參議王弘遠爲
經歷庚申完者帖木兒言諸軍將士有能用命効力
建立奇功者請所賞宣勅依常制外加以忠義功臣
之號從之辛酉以完者帖木兒仍前少師知樞密院
事也速仍前太保中書右丞相帖里帖木兒以太尉
添設中書左丞相丙寅立行樞密院于阿難答察罕
腦兒命陝西行省左丞相禿魯仍前少保兼知行樞

元史紀事本末卷四十七
密院事壬申命帖里帖木兒仍前太尉左丞相為知
大撫軍院事申書右丞陳敬伯為中書平章政事九
月甲戌朔義士戴晉生上皇太子書言治亂之由命
右丞相也速以兵往山東命叅知政事法都忽刺分
戶部官一同供給丁亥以兵興迤南百姓供給繁重
其真定河南陝西山東興寧等處除軍人自耕自食
外與免民間今年田租之半其餘雜泛一切住罷辛巳
大明兵取平江路執張士誠乙酉

大明兵取通州丁亥

大明兵取無錫州己丑詔也速以中書右丞相分省

山東沙藍谷里以中書左丞相分省大同丙申太師
汪家奴追封充王謚忠靖己亥命帖里帖木兒提調
端本堂及領以經筵事辛丑

大明兵取台州路時台州温州慶元三路皆方國珍
所據冬十月甲辰朔豹高以兵入山西定孟州忻州
下朔州遂攻真定詔也速自河間以兵會豹高取真
定已而不克命也速還河間豹高還彰德乙巳皇太
子奏以淮南行省平章政事王信為山東行省平章
政事兼知行樞密院事立中書分省于真定路丙午
加司徒淮南行省平章政事王宣為沂國公丁未享

于太廟壬子詔擴廓帖木兒落太傅中書左丞相并
諸兼領職事仍前河南王錫以汝州爲其食邑其弟
脫因帖木兒以集賢學士同擴廓帖木兒於河南府
居其帳前諸軍命瑣住虎林赤一同統之其河南諸
軍命中書平章政事內史李克彞統之關保本部諸
軍仍舊統之山東諸軍命太保中書右丞相也速統
之山西諸軍命少保中書左丞相沙藍荅里統之河
北諸軍命知樞密院事額高統之赦天下甲寅以火
里赤爲中書平章政事乙丑命集賢大學士丁好禮
爲中書添設平章政事丙寅平章內史關係封許國

公已巳

大明兵取溫州十一月壬午

大明兵取沂州守臣王信遁其父宣被執癸未

大明兵取慶元路丙戌以平章政事月魯帖木兒知

樞密院事完者帖木兒平章政事伯顏帖木兒

沙並知撫軍院事戊子

大明兵取嶧州乙未以知樞密院事額高爲中書平

章政事命太尉中書左丞相帖里帖木兒爲撫軍院

使丁酉命帖里帖木兒同監脩國史命關係分省于

晉寧辛丑

大明兵取益都路平章政事保保降宣慰使普顏不
花總管胡濬知院張俊皆死之十二月癸卯朔日有
食之丁未

大明兵取般陽路戊甲

大明兵取濟寧路陳秉直遁己酉

大明兵取萊州遂取濟南平路丁巳

大明兵入杉關取邵武路時邵武建寧延平福州興

化泉漳汀潮諸路皆陳友定所據庚申以楊誠陳秉

直並為國公中書平章政事甲子命右丞相也速大

尉知院脫火赤中書平章政事忽林台平章政事額

高知樞密院事小章與堅帖木兒江文清驢兒等會

楊誠陳秉直伯顏不花俞勝各部諸軍同守禦山東

又命關係往援山東丙寅以莊家為中書參知政事

庚午

大明兵由海道取福州守臣平章政事曲出遁行宣

政院使朶耳死之是月方國珍歸于

大明詔命陝西行省左丞相禿魯總統張良弼脫列

伯孔興各枝軍馬以李思齊為副總統禦關中撫安

軍民脫列伯孔興等出潼關及取順便山路渡黃河

合勢東行共勤王事思齊等皆不奉命是歲詔分潼

關以西屬李思齊以東屬擴廓帖木兒各罷兵還鎮
於是關保退屯興州商高留屯湮關

二十八年春正月癸亥申朔皇太子命關保固守晉寧
總統諸軍如擴廓帖木兒拒命當以大義相裁就便
擒擊以中書平章政事不顏帖木兒為御史大夫辛
巳詔諭擴廓帖木兒曰比者也速上奏卿以書陳情
深自悔悟及省來意良用惻然朕視卿猶子卿何惑
於儉言不體朕心隳其先業卿今能自悔固朕所望
卿其思昔委任肅清江淮之意即將興寧真定諸軍就
行統制渡河直趨徐沂以康靖齊魯則職任之隆當

悉還汝衛輝彰德順德皆為王城鄉無以貊高為名
縱軍侵暴其晉寧諸軍已命關保總制策應戡定山
東將帥各宜悉心庚寅彗星見于昴畢之間是月

大明兵取建寧延平二路陳有定被執二月壬寅朔
詔削擴廓帖木兒爵邑命禿魯李思齊等討之詔曰
擴廓帖木兒本非察罕帖木兒之宗俾嗣職任興承
遺烈昇以相位陟以師垣崇以王爵授以兵柄顧乃
憑藉寵靈遂肆跋扈搆兵關陝專事吞併貊高倡明
大義首發姦謀關保弗信邪言乃心王室陳其罪惡
請正邦典今禿魯李思齊其率兵東下共行天討癸

卯武庫災癸丑

大明兵取東昌路守將申榮王輔元死之丙辰擴廓帖木兒自澤州退守晉寧關保守澤潞二州與貊高軍合己未

大明兵取寶慶路甲子汀州路總管陳谷珎以城降于

大明丙寅

大明兵取棣州是月

大明兵至河南李思齊張良弼等解兵西還詔命知樞密院事脫火赤平章政事魏賽因不花進兵攻晉

寧李思齊次渭南張良弼次櫟陽興化泉州漳州潮州四路皆降于

大明二月庚寅彗星見于西北壬辰翰林學士承旨王時太常院使陳祖仁上章乞撫諭擴廓帖木兒以兵勤王赴難是月有星流于東北衆小星隨之其聲大震

大明兵取河南李思齊張良弼會兵駐潼關火焚良弼營思齊移軍葫蘆灘調其所部張德歛穆薛飛守潼關

大明兵入潼關攻李思齊營思齊棄輜重奔于鳳翔

是月

大明兵取永州路又取惠州路夏四月辛丑朔

大明兵取英德州丙午隕霜殺菽戊申

大明兵取廣州路又取嵩陝汝等州五月庚午朔

大明兵取道州李克彛棄河南城奔陝西推李思齊

為總兵駐兵岐山是月李思齊部將忽林赤脫脫張

意據盩厔商高據武功李克彛據岐山任從政據隴

州六月庚子朔徐溝縣地震癸丑

大明兵取全州郴州梧州藤州尋州貴象鬱林等郡

甲寅雷雨中有火自天墜焚大聖壽萬安寺壬戌臨

州保德州地震五日不止

大明兵取靜江路是月廣西諸郡縣皆附于

大明秋七月癸酉京城紅氣滿空如火照人自旦至

辰方息乙亥京城黑氣起百步內不見人從寅至巳

方消貊高關保以兵攻晉寧是月李思齊會李克彛

商嵩張意脫列伯等於鳳翔海南海北諸郡縣

于

大明閏月己亥朔擴廓帖木兒與貊高關保戰敗之

擒關保貊高遣其斷事官以聞詔關保貊高間謀搆

兵可依軍法處治關保貊高皆被殺辛丑

大明兵取衛輝路癸卯

大明兵取彰德路乙巳左江右江諸路皆降于

大明丁未

大明兵取廣平路丁巳詔罷大撫軍院誅知大撫軍院事伯顏帖木兒等詔復命擴廓帖木兒仍前河南王太傅中書左丞相統領見部軍馬由中道直抵彰德衛輝太保中書右丞相也速統率大軍經由東道水陸並進少保陝西行省左丞相禿魯統率關陝諸軍東出潼關攻取河洛太尉平章政事李思齊統率軍馬南出七盤金商克復汴洛四道進兵犄角勦捕

毋分彼此秦國公平章知院俺普平章瑣住等軍東西布列乘機掃殄太尉遼陽左丞相也先不花郡王知院厚孫等軍捍禦海口藩屏畿輔皇太子愛猷識理達臘悉總天下兵馬裁決庶務具如前詔壬戌白虹貫日癸亥罷內府河役甲子擴廓帖木兒自晉寧退守真寧

大明兵至通州知樞密院事卜顏帖木兒力戰被擒死之左丞相失列門傳旨令太常禮儀院使阿魯渾等奉太廟列室神主與皇太子同北行阿魯渾等即至太廟與署令王嗣宗太祝哈刺不華襲護神主畢仍

留室內乙丑白虹貫日罷內府興造詔准王帖木兒
不花監國慶童爲中書左丞相同守京城丙寅帝御
清寧殿集三宮后妃皇太子皇太子妃同議避兵北
行失列門及知樞密院事黑厮官者趙伯顏不花等
諫以爲不可行不聽伯顏不花慟哭諫曰天下者世
祖之天下陛下當以死守柰何棄之臣等願率軍民
及諸怯薛歹出城拒戰願陛下固守京城卒不聽至
夜半開健德門北奔八月庚申

大明兵入京城國亡後一年帝駐于應昌府又一年
四月丙戌帝因痢疾殂於應昌壽五十一在位三十
六年太尉完者院使觀音奴奉梓宮北葬五月癸卯
大明兵襲應昌府皇孫買的里八剌及后妃并寶玉
皆被獲皇太子愛猷識禮達臘從十數騎遁
大明皇帝以帝知順天命退避而去特加其號曰順
帝而封買的里八剌爲崇禮侯

帝紀十一

元史卷四十一 帝紀十一

元史卷四十一 帝紀十一


元史卷四十一 帝紀十一

元史卷四十一 帝紀十一

元史卷四十一 帝紀十一

元史卷四十一 帝紀十一

元史卷四十一 帝紀十一



The left page of the manuscript is mostly blank, with some faint ink marks and a small, dark, hook-shaped mark near the top left corner. There are also some stains and signs of wear at the bottom of the page.

